


KUTÈÈLEJA, KUJINGULULA,

KWENZA CÌDÌ DÌYÌ

DYÀ NZAMBÌ DYÀMBA

 Mpindyewu, mikàbà yà mēyi eyi, bwà disangisha edi mu dindà emu, ki nyà disumbisha to, yidi ànu bwà Èkèleeziyà anyi bwà muntu kampànda, bwalu mmitàngile Dilongesha. Kàdi mu masangisha à pambèlu pààpa, yidi yilela cimvundù, bwàlu mbikolè bwà bantu bàbìdi bàà kutùdì kumònabò bintu mu mùshindù ùmwè menemene, kàdi bìvwa bìkèngela bwà twètù kwikala ne mwoyi ùmwè, nànsha bishi. Kàdi cyôci, twètù mu tabernacle emu, mikàbà yà mēyi eyi yidi, nudi numòna pa . . . Yidi ànu bwà balundà cyanààna, ne bikwàbò.

² Mpindyewu twinyikàayi mitù yètù bwà katanci kakesè cyanààna bwà disambila. Mbanganyi bàdi bàswè kubàvùlukabò panùdì ne mitù yènù miinyika apu? Ànu ku cyanza cyela muulu cyanààna, wamba ne: “Mukalenge, ndi—ndi mu lukèngelu leelù ewu, ne ndi dijinga ne ngàsà Webè,” nànsha ciikàle cinyi.

³ Taatù wetù wa mu Dyulu, tudi tuseemena mpindyewu ku Nkwasa Webè wa ngàsà, bwalu tudi balòmbiibwe bwà kucyèza. Kàdi bàkatwàmbila kùdì Mwan’Èbè, ne Musùngidi wetù, bwà ne bu twètù mwà kuKulòmba cintu kanà cyònsò mu Dìnà Dyèndè, nebàtùpèci. Ki bwà cinyi, Mukalenge, bamanyè ne tudi ne mwoyi mu mindidimbì yà Dilwa Dyèndè, nènku mpindyewu biimàne mu mindidimbì yà luse Lwèndè, dībà adi tudi baswè kulòmba, Mukalenge, bwà Wèwè kusungula, ku Nyumà Mwìmpè, bintu bìvwa bìkèngela bwà twètù kulòmba abi. Nènku tudi tuumvwa mu dindà emu, ne kabyèna mwà kwikala bibèngangane ne Dìyi Dyèbè anyi bwakàne Bwèbè bunène to, ne luse Lwèbè ne ngàsà, bu twètù mwà kulòmba ne tupetàku disàmbiibwa dyà pabwàdì leelù ewu dyumukila kùdì Nyumà Mwìmpè. Bwà ne Wàbwelakù munkaci mwètù ne wàjingululakù meeji à myoyi yètù, wàtùbuulwilakù myaba yà butekète bwètù, ne wòndopakù mabèèdì ètù, ne wòndopakù myoyi yidi micìbùlùke, ne wàsùngilakù bàdi bajìmine, ne wàlongolola bantu bwà Dilwa Dyèndè. Mukalenge, tèèlejàaku disambila edi.

⁴ Mpindyewu netùbalè Dìyi Dyèbè. Nènku—nènku tudi tulòmba, Mukalenge, bwà ne pa dìleesònà dyètù dyà kàlaasà kàà Dyàlumingu mu dindà emu, bwà Wèwè kutwàla dimvwija dyà dibala ne kuDìbuulwila myoyi yètù. Bwalu, tudi tulwa mwab’ewu bwà kiipàcila kàmwèpelè. Kwòkò kiipàcilà aku, kàdi

kàmwè, nkàà kutàmba kuKumanya bîmpe menemene. Twètù bàdi beena Kilistò, ku Diitabuuja, tudì baswè kuKumanya bîmpè bitàmbe. Aba bàdi kabàyi banji kulwa beena Kilistò abu, mbaswè kuKumanya bu Musùngidi wabò. Aba bàdi bàsaama, mbaswè kuKumanya bu Mwondopi wabò. Ne tudì tulòmba bwà kakwikadi muntu nànsha umwe uumuka mu nzùbu emu, byanza bitupù nànsha, kàdi bwà mulòmbò wònsò wikalè mùjiibwe mu katòba, ne dijinga dyònsò dikùmbàjiibwe, ne muntu—ne muntu yònsò mwikalè ne disànkà, bùumukila mu nzùbu emu, bàmba, bu bàvwà bàfùmìna ku Emmawùsè abu ne: “Myoyi yètù kayìvwa yilákuka kapyà munda mwètù, pàvwàYe wàkula neetù mu njila apu anyi?” Bwalu tudì tulòmba nùнку mu Dìna dyà Yesù. Amen.

⁵ Mpindyewu bwènù nwènù bàdi baswè kubuulula mu Mukàndà wènù abu. Pa ciibidilu, ndi mujandule ne, mu masangisha à butangadiki, bwà ne ànu tusunsa tutwè ku makumi àbìdì anyi makumi àsàtù ntùdi twènza diyiiisha dyà cikùmà dyà nyumà, pashùishe dibìikila dyà ku cyoshelu. Kàdi bu mùdì eci kàlaasà kàà Dyàlumingu, ncyèna muswè kucyèna mùshindù awu nànsha. Ndi ndyùm vwa mutambe kulombodiibwa bwà kwangata dìbà dyànyi ne kwakula pa Dìyi.

⁶ Mpindyewu, kwòkò muntu kampànda kàyi mudyumvwe bîmpè to, bwà mashikà àbùngi menemene, cintu cìmwèpelè cyùdì ne cyà kwenza ncyà. . . Mwanèètù, mulami wa ntempèlò, ùdì lwà paanyimà pàà èkéleeziyà pààpa, ela wèwè ànu cyanza cyèbè muulu mùshindù ewu lwà paanyimà pààpa, kudiyè, nènku yèyè neàbàndishè luuya. Nènku tudì baswè bwà wèwè kwikalè mucyankàme ne kudyùm vwa bîmpè menemene. Nènku tèèlejàayi Dìyi, bwalu tudì tweyemena Nyumà Mwîmpè bwà kutùlongesha Dìyi dyà Nzambì. Kàdi nudi bònsò mwà kutèèleja bîmpè anyi, lwà panyimà pààpa? Nwènù mwà kutèèleja bîmpè, elàayi byanza byènù muulu, ní nudi—ní nudi mwà kutèèleja bîmpè. Mbîmpè.

⁷ Mpindyewu ndi muswè bwà nùbuululè pàmwè naanyi, ndi ne cyena-bwalu kampànda cìfùnda kaaba aka, ne Mufùndu kampànda. Pa nàнку ndi muswè bwà nùbuululè pàmwè naanyi, dyàmbedi, ku Mukàndà wa Loomò, Loomò, nshapità wa 9. Nènku tudì baswè kubala bwà dileesònà dyà Mifundu, dyàmbedi, mu Loomò 9.11.

(Bwalu bânà abu kabàyi banji kulediibwa, anyi kabàyi bènze bîmpè anyi bibi to, bwà ne kiipàcìlà kàà Nzambì bilondèshìle disungula kukùmbànaku, kabiyi ku byenzedi to, kàdi bwà ewu udi ubiikila;)

Bàvwa bambile maamù ne: Mwanàbutè neàsadiè mwakùnyi.

Bu wàkafùndàbo ne, ndi munange Yakòbò, ne ndi mukine Esawù.

⁸ Nzambì àsakidilèku mabènesha Èndè ku dibala dyà Mufundu ewu. Nènku mpindyewu bwà cyena-bwalu, bwà kushindika dileesònà dyànyì, ndi muswè kwangata eci cyena-bwalu: *Kutèèleja, Kujingulula, Kwenza Cìdì Dìyì Dyà Nzambì Dyamba*. Anyìshaayi ncyambùlùlè kàbìdì. “Kutèèleja, ne kujingulula, ne pashìishe kwenza cìdì Dìyì dyà Nzambì dyamba.”

⁹ Mpindyewu, tudi bamanyè bímpe menemene, twètù bàdì bòndola Mifundu munyà ne butùkù, ne tubala bibèjibeji byètù ne tutèeleja bumvwiji bàà nguumù, ne buloba ebi bu mbukwaciibwe mpindyewu ku bukòòkeshi bwà makolè àbidi manène à nyumà. Ne ónsò àbidi mmakolè à butèndeledi. Kàbìdì ndi ngìtabuuja ne mu mutanci mukesè emu makolè manène aa neàfike ku diteetangana dyà makàndà dyà ndekeelu. Ne makolè wònsò àbidi manène aa àvwa maleejiiibwe mu bàna bàbìdì bàà Izàkà aba. Mùshindù mene ùvwa Nzambì, mu lungènyì Lwèndè lùdì kalùyì mpwilù alu, ùkaavwa mumanè kutùleejila bintu byònsò ebi mu mundidìmbì; bwà twamòna mwà kumanya ku bintu ebi, ne ditwishiiibwa, cìdì citwindile kumpàla. Mutàmba kucipàtwila patòòke, mu mùshindù wà ne Nzambì ne Dìyì Dyèndè, ne bufùki ne Buloba bwèndè, mbitàmbe kulongolodiibwa bipwàngàna byònsò pàmwè, mu mùshindù wà ne nànsha ngè—ngènzàmpèkàatù ùdì mwà kumòna ne cintu kampànda cìdì cyamba kwenzeka. Nzambì ngudi mucyakàje mùshindù awu. Kakwèna muntu nànsha umwe wàpeta pàà kumbingila to.

¹⁰ Mpindyewu tudi tumòna mu bàna aba bàbìdì ne pàvwàbo, kumpàla mene kwà kulediibwàbò, bàvwa munkaci mwà kulwishangana. Nànsha mùvwàbì ne mamwàbò virgò awu... Bwalu, yèyè ùvwa virgò, Lebèkà mulenga uvwa musèlàngàne ne dimiinu dyà mulayi wà Nzambì awu, Izàkà; bwà ne bùbìdì bwàbò bàvwa beena kwitabuuja bàà Nzambì bajidila, bùlè tètè ne Nyumà, badyànjila kulongolwela dibàkà mene dyàkabàsangà pàmwè adi. Nzambì ùvwa mudyànjile kumanya cyòcì aci. Kàdì mmunyì mùvwà cintu bu nàнку mwà kulwila kùdì maamù umwe awu, kùdì taatù umwe? Umwe, muntu mubyamùbyàlè; ne mukwàbò, muntu mwìmpè mutàmbe; ne mùshindù mene ùvwa muntu mwìmpè awu ùmwèka bu mubì, ne mubì ùmwèka bu mwìmpè.

¹¹ Mpindyewu aci cìdì, cìtu nàнку misangu yònsò, ne neciikalè misangu yònsò ànu ndongamu wa Nzambì. Nzambì kèna mwà kushintulula ndongamu Wendè to. Bwalu, Yèyè ùdì ùvwija ndongamu Wendè mupwàngàne, bwalu cìdì citùpà Cyèndè.

¹² Mu budimi bwà Edènà, mpèkaatù ùvwa mulenga menemene mu mùshindù wà ne wàkakòka ntèmà yà Evà kuumumusha ku bwakàne, kumutùmà ku mpèkaatù. Nènku mu budimi bùmwebùmwe abu mùvwa mucì wà Mwoyi amu, mùvwa kàbìdì mucì wà lufù.

¹³ Tudi bafwànyine kucimanya leelù ewu bu mukenji wà dipangakana. Bwà ne, mwaba ùdi bwimpè, ùdi bubì; mwaba ùdi cyakàne, ùdi cyà mafi. Kashidi kèètù, nànsha bàmba ne nyungulukilu wetù ùdi bìshi, katwàkwikala bakùmbàne mwà kutàpuluka ne bwikadi bwà bintu ebi nànsha. Bwalu, Pòlò wàkamba ne: “Pàndi njinga kwenza maalu mimpè, dībà adi ke dīdi bubì bwimanepu.” Ngènzàmpèkààtù kadyàkukùmbana mwà kutàpuluka ne mwena Kilistò nànsha, ne mwena Kilistò pèndè kàkukùmbana mwà kutàpuluka ne ngènzàmpèkààtu to. Nekwikalè ntèmù mwaba awu wa bwakàne, ne bujaadiki bwà mashimi, misangu yònsò. Nènku udi wudyènzela disungula dyèbè. Bùdi naabù mbwà kusugula luseke lùmwè anyi lukwàbò.

¹⁴ Kàdi mu bānà bābīdi bāà balūme aba, bīvwa bīkēmesha bwà kumanya cyōci aci, kumpālā kwà kulediibwabò, bōnsò bābīdi dimiinu dimwèdimwè adi, dyumukila ku Izākà, uvwà wa mulayi awu. Mpindyewù dileesònà dyètù ndile ndambù, nènku ndi njinga kupeta nshindameenù mukùmbane mu mùshindù wà nwàmòna mwà kuumvwa menemene cīndi muswè kwamba. Nènku mwānà wa kumpāla, Esawù, uvwa mulediibwe awu; tudi tujandula ne kabāvwa ànu bākòkangana ne bālwanga munda mwà mamwābò cyanàànà to, kàdi bākapātuka munda mwèndè, bènda bālwangana, Esawù mu dipātuka dyèndè, ke Yakòbò kumukwātaye ku cikànkanyì. Nènku bācīdi munkaci mwà kulwangana.

¹⁵ Ne mùshindù mene, ne mùshindù ùvwābo ne cyà kufùmina kùdi taatù anyi maamù, bāpwāngāne, bakezùke, basungula, bāà cijila, badilāmbūle abu! Pa nānku bwà kucishindika, ne, Nzambì ùdi ùbīkila ku disungula. Cīdi ne cyà kwikala nānku. Nànsha bāmba ne tatwèbè ne mamwèbè bāvwa bīmpè bìshi, balenge bāà bìshi, nànsha bāmba ne tatwèbè ne mamwèbè bāvwa beena Kilistò bāà bìshi, bìdi ànu bilāāle kùdi wèwè bu muntu nkāāyā, bwà diimana dyèbè kumpālā kwà Nzambì. Dileesònà edi dīdi dilongesha aci, ne bōbò, bānà bōnsò bābīdi abu, kùvwa mene ku disungula ne dibīkīdiibwa dyà Nzambì, taatù ne maamù, mukājì virgò ne mulūme wa cijila, bāvwa ndekeelu wa byònsò mu dimiinu dyābò amu mupātùkile Yesù Kilistò. Úvwa mulediibwe bu ewu uvwa mubiike ku bafwè. Úvwa muteciibwè, tatwèndè uvwa kumpālā kwèndè awu. Nènku yèyè úvwa mulayiibwe, ku dimiinu dyà Izākà edi, bwà ne buloba bujimā bývwa ne cyà kusūngidiibwa. Nènku mupātùkile munda mwà muntu wa mùshindù awu, ne mashi èndè matāmbè kukezuka mu mùshindù wà ne Nzambì kāvvakù mwà kwanyisha nànsha ne mwena Peleshètè awu alenge maamù awu nànsha, paanyimā pāà Abraham mumanè kumupèeshayè. Nzambì wākanyooka nzūbu wèndè ne bipūpu, e kwambayè ne: “Wèwè’s udi mwenze ànu bu muntu mumane kufwà,” mulamè musulù wà mashi awu kezukezu. Ne yèyè Lebèkà awu, mwakāne awu, wa cijila awu, maamù mutūma kùdi Nzambì ne mubiikila kùdi Nzambì.

Ne kuumukila ku dimiinu dyà cijila adi kupàtukamù muntu mupidyè diitabuuja ne mwena kwitabuuja. Nwamònu anyi? Pa nàнку mbilààle ku dibùikila dyà Nzambì, disungula dyà Nzambì.

16 “Ne kumpàlà kwà yònsò wa kudìbo kulediibwayè, Nzambì wàkamba ne: ‘Ndi munange Yakòbò ne mukine Esawù,’ kumpàlà kwà ní nganyì wa kùdìbo kwikalayè mulediibwe.” Pa nàнку mmunyi mutùvwà mwà kudyùmvwa. Muntu kampànda udi Nzambì mwakùle nèndè ne mukubiikile bwà kulwa ku mèèsà Èndè ne ku Nzùbu Kwèndè, ne kwikàle mwàn’Èndè wa balùme anyi wa bakàjì, kakwèna cintu nànsha cimwè citàmbe aci bunène to.

17 Bàna bàà balùme bàbìdì aba, twètù mwà kujooja ngiikàdilù wabò, umwe wa kùdìbo ùvwa wa nyumà, mwinè awu ùvwa Yakòbò. Ne muntu wa musunya awu ùvwa Esawù. Kàdi bàvwa bònsò batèndeledi. Nèнку cintu cimwècimwè aci ncyènzèke munda mwà bikondo, wa musunya ne wa nyumà.

18 Esawù ùvwa ùleeja muntu wa pa buloba, wa mubidi, mweyèmene ku butèndeledi, kàdi kàyikù ùkòokèsha to. Munda mwèndè kamùvwa cyà dzenza nàнку to. Yèyè kàvwa mwà kucyènza to. Munda mwèndè kamùvwa cyà kubànda kupìta bintu byà pa buloba, cintu cyà musunya nànsha.

19 Kàdi, Yakòbò, bìvwa ànu bipeepèle bwà yèyè kucyènza. Mpindyewu, Yakòbò, kiipàcilà kàmwèpelè kàvwa naaku Yakòbò, kàvwa ne yèyè ùvwa ùjingajinga bwanàbute abu, nànsha mubùpetà mùshindù kaayi, cikolà àbùpetà.

20 Ne mwinè nyumà wa dileediibwa òmwè adi ùcìdì ànu muleejìibwe pa buloba apa leelù, ne mmutàngile ku mpwilàmàmbù mpindyewu: mwena kwitabuuja wa nyumà; ne muntu wa musunya, mwena kwitabuuja wa musunya. Muntu nànsha umwe kàvwakù mwà kwamba ne kabàvwa batèndeledi to. Bàvwa batèndeledi. Kabàvwa bàmbe ne umwe ùvwa ùsadila “lupìngu” ne mukwàbò ùsadila “Nzambì” to. Bàvwa bònsò basadidi bàà Nzambì.

21 Mpindyewu, filaayi ntèmà yònsò ku Mifùndu mpindyewu pa cyena-bwalu eci, bwalu ndi mutwishìibwe ne necinùkwacishe menemene. Nwamònu anyi? Mpindyewu: “Ki mmuntu yònsò udi wamba ne: ‘Mukalenge, Mukalenge’ wabwela to, kàdi ewu udi wenza diswa dyà Taatù Wanyì udi mu Dyulu.”

22 Mpindyewu bu nwènù mwà kumòna, Yakòbò ùvwa ne cintu cimwèpelè cìvwàye ùjinga, bwalu, bilondèshile Dìyì, mabènesha ne ci—cintu cyà musinga bìvwa bilààle mu bukenji bwà bwanàbutè. Nèнку, Yakòbò, aci ke cìvwà kèndè kiipàcilà kàmwèpelè, cintu cimwèpelè cìvwàye naaci mu meeji èndè cìvwà cyà “kupeta bukenji bwà bwanàbutè abu.” Kàdi Esawù wàkabùdyombola. Yèyè mene uvwa naabu awu, wàkabùdyombola, anyi wàkabùfwa bundù. Kàdi Yakòbò ùvwa

ùbùjinga kàyì ùcyùka mùshindù ùvwàye mwà kubùpeta nànsha, yéyè ùvwa ùbùjinga.

²³ Ke mùshindù ùdibi nànkù bwà mwena kwitabuuja wa nyumà leelù ewu. Kènà ùcyùka mùshindù unùdì numuseka nànsha, nànsha nwênù bamwelùlwìle bìshi, nànsha yéyè ne cyà kwenza maalu àmwèka à macimbu bìshi ku mèsù kwà ngeelèlù wa meeji wa musunya. Kiipàcile kèndè kàmwèpelè mbukenji bwà bwanàbutè abu. Mmuswe kufika kùdì Nzambi, bwalu mmulediibwe naaci munda mwèndè. Kènà mwà kupanga kucyènza to.

²⁴ *Yakòbò* mbwena kwamba ne: “munyèngyanganyi wa mwaba ku bukòlè” anyi “mushimyanganyi.” Kàdì paanyimà pàà mumanè kupeta ne mwangàte bukenji bwà bwanàbutè, wàkashintuluka. Adì dishintuluka’s, ku cyà musunya. Wàkabiiikiidibwa dîba adì ne, *Yakòbò*, “mwànà wa mfùmù ne Mukelnge,” uvwa mulwangàne Nendè.

²⁵ Mwena kwitabuuja wa musunya leelù ewu ùdì wàmba ne: “Kaa, pàndì ànu nya mu èkèleeziyà ne ngenza cìdì cijaalame, kùdì dishiilangana?” Awu’s ke musumbà wà Esawù. Ùcidi ànu wèlulwila ne ùdyombola bukenji bwà bwanàbutè, Kènà ùbùcyùka to. Kàdì *Yakòbò* ùvwa mubùnage.

²⁶ Ne mulùme wa nyumà leelù ewu, ne mukàjì wa nyumà, udi musungula, mudyànjlila kulongolola kùdì Nzambi bwà kufika ku Mwoyi wà Cyendèlèlè, bu byòbì bikèngela bwà kusumbisha cyònsò cìdìbo naaci, bu byòbì bikèngela bwà kukùpula dìnà dyàbò mu mukàndà wònsò wà èkèleeziyà wa mu ditùnga, bàdì ànu batùngùnùke ne kunanga bukenji bwà bwanàbutè abu. Ki cintu cimwèpelè cìdì ne musinga bwàbò aci ne: “kupeta ànu bukenji bwà bwanàbutè abu,” kwàjiki. Nànsha byòbì bikàlè bìshi, nànsha byòbì bikèngela bwà kufika mu cipidì kaayi, byòbì bikèngela kupweka ku cyoshelu ne kwasa mwadi, buu-huu, ní bidì bikèngela bwà bóbò kunyeemakana kutwà—kutwà—kutwà kwàka ne eku ne kwalùkila kukalongolola maalu, ne kusumbisha cìdìbo naaci, anyi—anyi kwimansha cyònsò cìdìbo naaci ne kushààla beena lwendu ne beenyi, kabyèna ne bwalu to. Bóbò mbàswe bukenji bwà bwanàbutè. Ki cyònsò cìdì cibàsankisha aci, bukenji bwà bwanàbutè. Mpindyewu, kanùdyulu bantu abu to. Kabèèna mwà kupanga kucyènza to. Bàvwa badyànjlila kulongolola bwà cyòci aci, basungula bwàci.

²⁷ Ne pashiishe tudi tumòna ne bantu bàbidì aba, wa musunya ne wa nyumà, ki mùshindù wùtùbì byenzèke misangu yònsò. Mùshindù awu ngùdibi leelù ewu. Bìtu misangu yònsò ànu mùshindù awu.

²⁸ Kaayinà ne Abèlè. Mu budimi bwà Edènà, pàakafùkiibwa Edènà, kùvwa micì yìbidì bwà muntu kwenzayè disungula dyèndè. Umwe, wàkalwa wa lungènyi; mukwàbò, wàkalwa Mwoyi. Kùvwa bânà bàà balùme bàbidì, Kaayinà ne Abèlè,

bònsò bàbìdì batèndeledi. Umwe wa kùdìbo ùvwa ùjinga Mwoyi wà Cyendèlèlè, ne wàkalàmbula Nzambì, ku diitabuuja, mulàmbù mwìmpè mutàmbe wà Kaayinà. Cifwànyikijilu cipwàngàne cyà maèkèleeziyà leelù ewu: èkèleeziyà wa mubidi, èkèleeziyà wa nyumà. Ne kakùyì mpatà to ndi munkaci mwà kwakula ne misumbà yònsò yìbìdì ayi mpindyewu mene, ne pàmwàpa ku mukàbà wà mēyì nengàakulè naabò binunu makumi.

²⁹ Kàdi, tàngilàayi, èkèleeziyà wa mubidi, cìdì ànu èkèleeziyà wa musunya. Kabàtu kacya bakùmbàne bwà kubànda ku mutù kwà kantu kakesè aku kàà ne “ndi mushàale wa mu èkèleeziyà. Mémè muyè mu èkèleeziyà, mémè ngenza ne mwànyì mwònsò, ki cyònsò cìdì Nzambì ulòmba aci.” Mpindyewu, ki cintu cimwècimwè cyàkenzà Kaayinà ncyòci aci. Wàkaya kenza cyoshelu. Wàkafila mulàmbù, wàkatwàla mamuma à mu buloba. Ke kwambayè ne: “Ki cyòci eci, Nzambì. Aci ke citàmbe bwìmpè cìndì naaci. Anyi udi ucyàngata anyi ucilekela.” Mùshindù awu ke ùdì mwena kwitabuuja wa musunya wìtabuuja leelù ewu. “Mukalenge, nenyè mu èkèleeziyà. Nenkashàale wa mu musumbà mutàmbe bwìmpè ùndì mwà kupeta. Nemfutè mfranga yànyì kùdì èkèleeziyà. Nengènzè cìdì cìmpè. Mpindyewu, ki citàmbe bwìmpè cìndì mwà kwenza ncyòci eci. Nengàmbulwishe bwà kusumbilakù mukàji wa mu lufwilà makàlà. Anyi, nempèeshèku bānà batekète bilàmbà byà kulwàta.” Byòbì abi mbìmpè, ncyèna ne cyà kubìdyula naaci to. “Kàdi ki cyòci aci, kwàjikì. Wèwè muciswè, cyangàtaaku; Wèwè kùyì muswè to, Kwèna ne cyà kucyàngata to.” Mpindyewu, ki lwidì lwà èkèleeziyà wa musunya leelù ewu ndwòlò alu.

³⁰ Kàdi èkèleeziyà wa nyumà! Abèlè, ku dibuulula, ku ngàsà, wàkamòna dyàmwàmwà dyà cyòci aci, ne ku diitabuuja yèyè wàkalàmbula Nzambì mulàmbù mwìmpè kutàmbe Kaayinà. Ne cìdì cijaadika bwakàne bwèndè, Nzambì.

³¹ Cintu cimwècimwè aci kwenzekaci mu Ishàmèlè ne Izàkà. Umwe ùvwa wa mu musunya, ne mukwàbò ùvwa wa mu Nyumà. Umwe, wa mukàji mupika; umwe, wa mukàji mudìshikàmìne.

³² Cintu cimwècimwè aci cyàkenzekela Izàlèlèlè ne Moàbà, èkèleeziyà minène yìbìdì midisange pàmwè. Ne pàvwà Izàlèlèlè ùjinga kuya ku mwaba wàbò mulaya, èkèleeziyà wa nyumà, cisàmbà cyà Yakòbò, Izàlèlèlè ùvwa mu njila; Bantu bàà Esawù bààkatwilangana naabò, beena Moàbà, èkèleeziyà wa bukòlè. Kàdi mulombodi munène wa èkèleeziyà, Baalàmà, wàkapweka bwà kwela mwanàabò mulawu, kàdi wàkasangana ne kàvwa mwà kwela mwanàabò mulawu to. Wàkapangila, ne bufofo bwà mèsù èndè, bwà kumòna ndongamu mpadyànjala kulongolola, bwà ne, ne bwà kumòna Dìyì dyà Nzambì.

³³ Dyàmbedi: “Diitabuuja dìdì difùma ku dyumvwa, dyumvwa

dyà Dìyì dyà Nzambi.” Dìbà adi mwena kwitabuuja ùdi ùDitèèleja, ùDijingulula, wènza maalu mùdiDi dyamba. Muntu wa musunya neàDitèèlèjè, cyonà cyàDi, kàdi kàdyà. . . *Kutèèleja* mbwena kwamba ne “kuumvwa” Dyòdi adi. Kutàngila, nkushàala mutàngile cintu kampànda; kàdi *kucimona*, “nkuumvwa” cyòci aci. “Muntu yèyè kàyi mulediibwe cyàkàbìdi, kèna mwà kumòna anyi kuumvwa Bukalenge bwà Nzambi to.”

³⁴ Mpindyewu, ki Izàlèlèlè ewu wènda ùlwa, wènda ùbànda ne mulayi wà Nzambi, bwà ne bàvwa batàngile ku buloba bulaya. Kàbàvwa beena bupidyà to, kàdi beena kwitabuuja, beena kwitabuuja mu Nzambi umweumwe uvwa nendè Izàlèlèlè awu, kupàtuka bwà kuteeta kwela mwanààbò mulawu, bwalu wàkamba ne mwanààbò, cyà bushùwà ùvwa muntu mubi bwalu ùvwa mwenzè bintu byàbùngì bìvwà bibì. Kàdi, nudi numòna’s, yèyè wàkapanga kumòna disungula.

³⁵ Cintu cimwècimwè aci ne Esawù ne Yakòbò! Esawù ùvwa ùmwèka bu muntu mutàmbe bwìmpè. Wàkasòmba panshi e kwenzayè bintu byà dinanga. Yèyè—yèyè wàkakòweleela tatwèndè mpofo mukùlàkàje awu, kumupetela munyiinyi wà nyama wa ntole ne kumukòwoleela, nènku ùvwa nsongààlùmè wa maalu mìmpè. Bintu byàbùngì bìdi beena kwitabuuja bàà musunya bènza mu mulongo wa ntèndeleeu, bàmbulwisha bisùmbù byà bantu, ne—ne bàfucila bantu mfranga yà mu lùpitaadi, ne bintu byà butèndeleeedi, kàdi kì ng’aci cìndì ngàmba to.

³⁶ Moabà ùvwa mwìmpè, ditùnga dinène, mwanààbò. Ne Yakòbò ùvwa mwenzè bintu byònsò, ùvwa muntu muvilè diitabuuja; kàdi nànsha nànku ùvwa ne cintu cimwèpelè civwàye ùlumbila, civwa ncyà kupeta mulayi, bukenji bwà bwanàbutè abu. Ki Izàlèlèlè ùlwàlwa ewu, bàna bàà Yakòbò, biikàle ne kiipàcìlà kàmwèkàmwè aku. Mpindyewu nganyì wàbinga?

³⁷ Baalàmà wàkiibaka byoshelu mwandamutekète; mu Izàlèlèlè kùvwa byoshelu mwandamutekète. Baalàmà wàkalàmbula milàmbù mwandamutekète yà nyama mikezùke; Izàlèlèlè wàkalàmbula milàmbù mwandamutekète yà nyama mikezùke. Nànku, bwà pa kutàngila ànu mùvwàbo babyènza bu mishingà, Moabà ùvwa pèndè mutèndeleeedi ànu bu mùvwà Izàlèlèlè amu, Esawù mutèndeleeedi ànu mùvwà Yakòbò amu, ne Kaayinà mutèndeleeedi ànu mùvwà Abèlè amu. Kàdi, bwalu’s mbulàale ku disungula.

³⁸ Bufofo kaayi’s wè! Mùshindù mwinè ùdi bàna bàà Esawù mpofo’s wè, mu ngaakwilù wa nyumà, beena Moabà, batàngila Izàlèlèlè mu cibandabanda bàmba ne: “Bàtàngilaayi. Kabèena dinguumba to. Bàdi musùmbà wà bantu bavile diitabuuja. Mbasòmbele mu ntenta. Kàdi twètù tudi ditùnga dinène. Mbenze bibì. Bàà bwalu abu kabàyi ne bulongolodi munkaci mwàbò nànsha. Bàdi ànu munkaci mwà kwenda kujèmbelèla,

bènda bàlonda mupròfetà.” Kàdi bàakapanga kumòna Nyòka wa Cyamù cyà kabanda ne Lubwebwe lutuuta kumpàlà kwàbò. Wàkapanga kumòna babiikidiibwe bwà kupatuka abu, musumbà musungula ùvwà wènda ùlonda díyì ditùmà dyà Bunzambi dyà Nzambi batàngile ku buloba bulaya.

³⁹ Mùshindù awu ngùdìbi leelù ewu. Bàdi bàmba ne: “Mmusumbà wa bansantu babunguluki bàà mu malaba. Mmusumbà wa bantu bàdi *cikampànda*, *cikansanga*, anyi *cikankènga*.” Kàdi bàpanga kumòna ne bàvwa bènda bàlonda luseke lwà Díyì dyà Nzambi.

⁴⁰ Izalèlèlà ùvwa mu njila mutàngile ku buloba bulaya. Nzambi, mu Díyì Dyèndè, ùvwa mwénze mulayi.

⁴¹ Yakòbò, cyàkamusàkà bwà yèyè kusungula bwà kupeta bukenji bwà bwanàbutè abu, nànsha cinyi cyenzèke, yèyè ùvwa muswè ànu bwà kubùpeta, bwalu yèyè ùvwa mumanyè ne bukenji bwà bwanàbutè abo bùvwa bulamè mabènesha. Bùvwa bulàmè mwoyi. Kàakacyùka mùvwàbò bùlwa to, cikolà àbùpeta. Ki civwà cintu cyà mushinga. Cipidì civwàbò mwà kulwila aci, kacivwa ne bwalu to. Ùvwa mubùswe. Nènku ùdi ne cyà kubùpeta. Nènku kubùpetayè. “Bàà disànka ng’aba bàdi ne nzala ne nyòòtà yà bwakàne, nebùujìibwè.” Ùvwa mu njila wèndè, ne ùvwa wènda ùbùlonda, ne wàkabùpeta.

⁴² Izalèlèlà ùvwa mu njila wèndè mutàngile ku buloba bulaya. Nànsha bàmba ne beena Moàbà bàvwa bùngì bishi ne milawu yàkateetàbo bwà kubèèla, bàkashidiimba too ne mu buloba bulaya.

⁴³ Kàdi leelù ewu kanwàdyà...nànsha bàmba ne mbàpetè mikenji bùngì bishi, nànsha bakèngèshìibwe misangu bùngì bishi, nànsha bakèngèshìibwe misangu bùngì bishi, nànsha bambe bintu bibi byà bishi, nànsha babiikile misangu bùngì bishi ne “bansantu babunguluki bàà mu maloba” nànsha bambe bintu bibi abi misangu bùngì bishi, èkèleeziyà neàye ànu kumpàla. Ùvwa ne cyà kuya ànu kumpàla. Nkushààla kwà mu Díyì dyà Nzambi.

⁴⁴ Musangu kampànda bamfùmù bàbidì bàkadikungwija pàmwè. Umwe wa kùdìbo ùvwa Aakàbà, mubi wa wòò, mukwàbò yèyè ùvwa Yèhoshàfàtà; èkèleeziyà wa nyumà, èkèleeziyà wa musunya.

⁴⁵ Aakàbà ùvwa mwena kwitabuujà wa ku mikàlù. Ùvwa ne bapròfetà. Kabàvwa beena bupidyà to. Kabàvwa beena bupidyà to. Kabàvwa batèndeledi bàà mpingù to. Bàvwa bapròfetà bàà beena Izalèlèlè, kadi bònsò bwàbò bàvwa balongèshìibwe ne badishìibwe ne bavwàdikìibwe kùdi mfùmù Aakàbà. E kushààlacì bu mwaba ùvwàbò ne nshindameenu wa cidiidi cyònsò.

⁴⁶ Yèhoshàfàtà kubwelayè, ùpweka, e kwenzayè cipungidi, cidi cilèma.

47 Kanwèna ne cyà kuswikakana ne beena bupidyà nànsha. Nànsha byà kumòna lufù, ni mmu mùshindù kaaayi, katwèna ne cyà kufùnda mènà ètù mu mikàndà mu èkèleeziyà yidì kayiyi yitabuujà Èvànjeeliyò mu kabujimà nànsha. Nànsha! Nenùbwelè mu lutàtu.

48 Kàdi bàkabwela mu lutàtu. Ki muntu mwakàne ewu kwambayè ne: “Kabìvwa bikèngela twètù kwanji kukonka Mukalenge dyàmbedi, bwà kujandula ní bìvwa bikèngela twètù kuya ku Laamòtà-Gilàda anyi?”

49 Mpindyewu tàngilàayi nùmòne mùvwa ndongamu ewu ùmwèka. “Laamòtà-Gilàdà ngwetù twètù. Ncintu cyètù, kàdi beena Suliyà mbabùnyènge Nzambi udi ne mwoyi. Twètù katwèna mwà kubànda ne kwangata buloba ebu anyi?” Kàbìdì wàkenza muyuuki awu mulenga be, ne mulondàngàne ne mikenji, mwakàne be, mu mùshindù wà ne Yèhoshàfàtà wàkawitaba.

50 Nènku, leelù ewu, bantu bàdi mwà kwimana mu cyambilu ne muyiiki mukwàtakaja wà dimanya dyà mu mitù, ne dilonga dyà tulaasà, too ne pàdibo mwà kuumusha Bukolè bwà Nyumà Mwimpè kule ne Bible ku dyumvwija. Bàdi mwà kuumusha dyondopa dyà kùdì Nzambi ku dyumvwija. Bàdi mwà kuumvwija dyakula dyà mu myakulu ne dyandamuna, bàdi mwà kuumvwija dibatiiza dyà Nyumà Mwimpè, ne ndyà ditùkù dikwàbò.

51 Kàdi muntu udi musungula kùdì Nzambi, muntu... “Mikòòkò Yànyi mmimanyè Dìyì Dyànyi.” Wèwè ne disungula dyà Nzambi adi pambidi pèèbè, kadyàkukulendwishaku to.

52 Yèhoshàfàtà kwambayè, mfùmù mwakàne awu kwambayè ne: “Kakwènakù mupròfeta, bwà twètù kukonka Mukalenge anyi?” Aakàbà ùvwa wènda ùya kàyi ùkonka aci to.

53 Mùshindù awu ke wùdì èkèleeziyà wa musunya wènza leelù ewu. Kaa, bàdi ne sèminèrè myùlè tètè ne bayiishi, bantu banène, balongeshi banène, beena mamanya à mu mitù, beena meeji matwè, bàtàbèèlà, kaa, ekèlekèle, kule menemene ne—ne bàtàbèèlà bàà mu èkèleeziyà wa mu-... anyi èkèleeziyà wa nyumà.

54 Mu matùkù à Noà, mu matùkù awu, tàngilàayi èkèleeziyà wa mubidi. Bàvwa cinyi? Beena maalu à mamanya, biibaki, bantu bàà meeji matwè. Kàdi basungula, Enòkà ne Noà, bàvwa balami bàà mikòòkò ne baabidimà, bantu bapwekèle, kabàyi balonge tulaasà nànsha, kabàyi bàà meeji matwè to, kàdi bamanyè Nzambi wabò; cintu kampànda munda mwàbò amu, cinyunga, cìbìikila. Netùfikèku mu katancì emu.

Mpindyewu, ki Yèhoshàfàtà kwambayè ne: “Kakwènakù mupròfeta anyi?”

55 Kaa, mu bushùwà bwà bwalu, bàà musunya's bàvwa naabò. “Ncyà bushùwà menemene, tudi naabò. Ndi ne sèminèrè lwà kwìnshì eku, bapàtemù tètè.”

56 Kulwabò ne nkàmà yinaayi bulubulu. Mpindyewu, aba kî mbeena bupidyà to. Mbakuukwidi bàà Yèhowàh Nzambì. Kulwabo, e kwambabo ne: “Anji tùpèèshaayiku katanci kakesè nènku netwambè cipròfetà.” Nènku ke bòbò bònsò kудisanga pàmwè. Kì kwalukilabò ne “Diyi dyà Mukalenge,” kì bòbò kwamba ne: “EMU MMÜDÌ MUKALENGE WÀMBA.” Bapròfetà bàà beena Izàlèlèlè. “EMU MMÜDÌ MUKALENGE WÀMBA. Bànda ùya, Mukalenge ùdi neebè. Nènku neùkwatè Laamòtà-Gilàdà, bwalu ngwa Izàlèlèlè bulelèlè.” Ne umwe wa ku balombodi kudyenzelayè nsèngù yibìdì minène yà cyamù cifiike, bu cileeji, kì kubangaye dipuusa. Kwambayè ne: “Ne cyòci eci newùpuusè Izàlèlèlè... anyi newùpuusè Beena Suliyà kubàpàtula mu Laamòtà-Gilàdà.”

Kàdi, Yèhoshàfàtà, cintu kampànda munda mwèndè!

57 Kaa, ndi ntèkemena ne Nzambì ùdi ùtèèka eci mu mwoyi wèbè. Kì ncintu kampànda cyùdì mwà kudipetela ku dilonga to. Kì ncintu kampànda cyùdì mwà kudipetela ku dibala to. Ncintu cìdì Nzambì, ku disungula, wènza bwèbè wèwè. “Kì ng'ewu udi unyeema anyi ewu udi uleej-... N'Nzambì udi uleeja luse.”

58 Kì Yèhoshàfàtà ne: “Mbantu balwàtè bìmpè be.” Kakùyì mpatà to wàkamba cintu kampànda cyà mùshindù ewu: “Bàdi ne meeji, ne mbantu bàà meeji matàmbe kutwa bânkaàdiku mùmvwè kacya. Mbalongeshiibwe mu kantu kwònsò. Kànsanki kààbò kàdi dīyī dīmwe. Bàdi ne bwobwùmwe bunène munkaci mwàbò. Kàbìdì bàdi ne meeji matwè, kàbìdì bàdi ne Bulelèlè bwàbùngi kùdìbo aku.”

59 Ntùpàkànyì yònsò eyi yìdì ne Bulelèlè. Mafi manène menemene àkaadi mambiibweku àvwa ne byà pa lukàmà makumi citèemà-... [Katùpà kàà mukàbà wà mēyī munda mutupù—Muf.] byà Bulelèlè munda mwàwù, mafi àkashimàbo Evà kùdì Satàànà awu.

60 “Kaa, kùdì Bulelèlè bwàbùngi mu bìdìbo bàmba, kàdi kakwènàkù mukwàbò kàbìdì anyi?”

61 Èè, nudi nwela meeji ne muntu awu wàkamba cinyi? “Pèètù naabò nkàmà yinaayi mijimà mwab'ewu, bàà meeji matàmbe kutwa, batàmbe bwimpè? Kabèena pambèlù apa mu cipèlèlè emu bènda banyeemakana eku ne eku bavwàle bu kî mbavwàle, badijingile bisèbà byà mikòòkò mu cimònò, anyi cintu kampànda to. Mbantu bândi mudiishe, bândi mulongeshe. Kì mbantu bàdi bapangè ABC to. Mbamanyi bàà mabàla, ne mbamanyè cintu. Bàdi bàshààla munyà ne butùkù, munkaci mwà kubala mivùngu ne bipròfetà. Mbamanyè cìdì cìmpè. Kàbìdì nkàadi naabò tàyàdì. Kàbìdì mbiimàne mwab'ewu ne mwoyi ùmwè, nkàmà yinaayi mijimà, bàmba ne: ‘Bànda, Mukalenge ùdi neebè.’”

62 Kàdi bu mèmè mwà kubala meeji à Yehoshàfàtá katùpà kípì cyaààà: “Kùdi ànu cintu kampànda cidi kaciyi mu cyòci to,” mùvwàye mufwànyine kwamba. “Kùdi ànu cintu kampànda cidi kaciyi cimwèka cijaalàme to. Kakwènakù mukwàbò nànsha umwe, mwaba kampànda ànyì?”

63 “Kaa,” mwàkambàye, “èyowà, kùdi mukwàbò, kàdi kí ngwa mu bulongolodi ebu to. Yèyè mmuntu wa wèndè mùshindù. Ùdi ànu muntu mupidyè diitabuujá.” Mmwenze bu mùdi Yakòbò amu. “Kàdi tudi bafwànyine kumukonka. Bàdi bàmba mùdiyè mupròfetà. Kàdi ndi ngèèla aci mpatà, bwalu ùsòmbela ànu ùngela milawu misangu yònsò, wàmba ne *cikampànda, cikansanga, ànyì cikankèngà, ànyì kacya kàtukù pèndè mungambilekù cipròfetà cyà cìmpè.*” Mmunyi mùvwàye mwà kukwambilaci? Nwamònu anyì?

64 Ki kwambabò ne: “Lwàyi tükamwangàtaayi. Yèyè's mmwànà wa Yimula.” Pa nàнку e kuyabò kamwangata.

65 Ki muntu kampànda kutwilanganayè nendè mu njila, kwambayè ne: “Mpindyewu, wèwè ambà cintu cimwècimwè cidìbò bàmba aci. Ùdi ne cyà kumvwangana ne nsangilu. Wèwè kùyi mwenze nàнку to, dyàkabi dyèbè!”

66 Yèyè ne: “Nèngàmbè ànu cidi Nzambi ùtèèka mukana mwànyì bwà kwamba aci, kí ncìngà cintu to.”

67 Pashìshe yèyè mumanè kufika kuntu aku, nènku bààkamupèèsha dilòòlò dimwè, yèyè kwamba ne: “Bànda, kàdi ndi mumòne Izàlèlèlà mutangàlàke bu mikòòkò kayiyi mulami nànsha.”

Ki Aakàbà kwambayè ne: “Ncìvwa mukwàmbile anyì?”

68 Mpindyewu, nkwekù kùdi nkàmà yìnaayi yìlwisha ùmwèpelè. Nkàmà yìnaayi milongèshìibwe, yà meeji matwè, milonge kàlaasà, balùme bàà lungenyi lutwè bàlwishangana ne cinyònga cikesè cimwèpelè, mutùdi bafwànyine kumubiikila, Miikà. Muntu ùmwe, kàdi nànsha nàнку yèyè muntu umwe awu ke uvwa ne Dìyi dyà Mukalenge, ke cìvwa cyèzà dishìilangana aci. Yònsò wa kùdìbò ùvwa wa mashimi, byàkadimwènekèla patòòke ne bìvwa byà mafi. Bwà cinyi Miikà yèyè ùvwa mushìilàngàne nàнку? Byàkakèngela bwà kwikalayè mupèlè, bwà kwikalayè mushìilàngàne anyì? To. Kùdi. . . Cyàkènzà ne Miikà ikalè mushìilàngàne ncinyi, mpàakashààlaye ne Dìyi. Dìyi dyà Nzambi ki dyàkashààlaye naadi.

69 Mpindyewu mbilayìibwe ne, mu matùkù aa: “Nzambi nèàpongololè Nyumà Wèndè.” Mmulayìle kùdi Danyèlè, ne: “Bantu, mu matùkù yikalà dibwe dituuta cimfwànyì ku makàsà, bantu bàdi bamanyè Nzambi wabò nebènzè maalu à kukèma.” Cipròfetà paanyimà pàà cipròfetà! Ne sèminèrè yònsò, bàà pa buloba, kabèèna mwà kubyùmusha to. Nzambi ke wacyèzà, nànsha bishi, ne bantu nebàcìlondè. Nwamònu anyì? Wa

musunya ne... Èkèleeziyà wa mubidi ne èkèleeziyà Mutàmbe-mfùkilu. Nudi numòna's, Dìyì didi dìfila dishiilangana.

⁷⁰ Ke cìvwà Yakòbò wèla meeji aci ne: "Nènku nànsha bàmba ne ncinỳì, ndi mumanyi ne ncyènaku mwà kubènèshiihwa pàndi nciyì mubàkùle bukenji bwà bwanàbutè abu to. Bukenji bwà bwanàbutè abu ki bungùikalà mèmè ne cyà kupeta."

⁷¹ Nènku, kàdi Esawù wàkabùkìna, ne bânà bèndè bàcìdi ànu bènta cintu cimwècimwè aci, too, ne leelù ewu. Mbabùkine. Bitu ànu nànkù misangu yònsò.

⁷² Dìbà kanà dyònsò dídiku ditàbuluja, bisòmbela bìlela ànu mapàsa. Adì ndiyì dyà kadiwu dyùmè, kàdi ndilelèlè. Pààkenzekà dilediibwa munda mwà, mwà Izàkà ne Lebèkà, dyàkatwàla mapàsa. Pààkafùkiibwa buloba, bwàkalela mapàsa, micì yibìdi. Ne pààkalediibwà Kaayinà ne Abèlè, cyàkatwàla bàbìdi. Pààkalediibwà Ishàmàele ne Izàkà, cyàkatwàla bàbìdi. Ne dìbà dyàkalediibwà Esawù ne Yakòbò, cyàkatwàla bàbìdi. Umwe wabò, wa mubidi (umwe wa kùdìbo, wa pa buloba); mukwàbò awu, Mutàmbe-mfùkilu. Nènku umwe ùvwa mutàngile ku byà mu bufùki, wa mamanya à mu mutù; mukwàbò yèyè ùvwa wènda ku bulombodi bwà Nyumà. Bisòmbele misangu yònsò ànu mùshindù awu. Pààkalwà èkèleeziyà wa ba-Luthériens...

⁷³ Twàngatàayi Mpenta, dyàmbedi. Tàngilàayi dilediibwa dyà Mpenta. Dyàkatwàla ditàbuluja dinène, dyà bukolè dyàkatàmpakanà pa buloba bujimà bùdi bumanyike, Mpenta. Kabyàkanènga to paanyimà pàà Mpenta too ne mwàkafikà Pòlò mwinè ku dyamba, ne: "Nekùjuukè bantu munkacì mwàbò, ne bintu bikònyàngàle, ne nebàjinge bwà kuumusha bantu kùdi Nzambì." Ke cyòcì aci menemene cìdìbo bènzè. Cìdi cìlela bìbìdi.

⁷⁴ Pààkalediibwà èkèleeziyà wa ba-Luthériens, Martin Luther wàkapàtula ditàbuluja dyà nyumà. Kadyàkanènga to too ne mùvwidilè Esawù, mumutwè ànu mu nyimà, ne kucìvwijayè bulongolodi. E kulelaci bìbìdi.

⁷⁵ Pashiishe paanyimà pàà cyòcì aci, kulwakù ba-Méthodistes, John Wesley, ditàbuluja dyà nyumà. Kàdi paanyimà pàà cyòcì aci, kulwaku bulongolodi, kucìvwijabo bulongolodi. Nènku kulelaci bìbìdi.

⁷⁶ Nènku paanyimà pàà cyòcì aci, kulwaku Mpenta, ditàbuluja. Nènku mpindyewu mbacìvwije bulongolodi, ne mpindyewu mbadilongolole bwà kwenzabo bulongolodi. Ne cìdi cìlela bìbìdi.

⁷⁷ Kàdi dimiinu dyà nyumà dyà Nzambì udi ne mwoyi adi, nànsha mùdìdi ne cyà kwikala dipìcì dyà ne njila amu, nànsha mùdìdi ne cyà kwikala dilalakanyi amu, didi misangu yònsò dilela ànu ditàpùluka. Esawù kàkashàala ntàntà mule ne Yakòbò to. Yakòbò mmwènzè ànu ùpeta bukenji bwà bwanàbutè

(Nzambi àtumbè), cyàkalòmba ditàpuluka. Nènku dībà didi muntu. . . Nànsha wèwè wa mu èkèleeziyà kaayi, yèyè mwikàle wa musunya, ne baanyàneebè baùdi ùtambakana naabò, bantu banùdi nunàya naabò twarta, nubala naabò bibèjibeji byà tusumbù twènù, ne bikwàbò; dībà dyùdi upeta bukenji bwà bwanàbutè, cintu kampànda cidi munda mwà mwoyi wèbè ùdi ne nzala yà Nzambi aci, paùdi upeta aci, cidi cibùikila cikèba ditàpulula. “Pàtukàayi munkaci mwàbò, ne ikàlaayi batàpulukè, mmùdi Nzambi wàmba.” Ditàpuluka!

⁷⁸ Èkèleeziyà ùdi ùsòmba mucyankàme. Nwamònu’s, kèna mwà kutungunuka to. Esawù ùvwa cifwànyikijilu cimpè cyà mwena kwitabuujwa wa musunya leelù ewu, kàyikù mwà kucimuna maalu àà pa buloba to. Kènà ùcimuna bintu byà pa buloba to. Bàcidi ànu banange kwenza mafestò, kujà kwàbò kwà maja, banange kulaaba bilaabu, bakàjji’s, kwisù kwàbò, ne—ne bàkòsa nsuki yàbò kàbìdi—kàbìdi bàlwàta tulàmbà tukesè twípì twà kalè; ne—ne balùme banange kuya ku nzùbu yà ditwila twarta, ne—ne kunwà mfwankà, ne kwela minèkù mikesè yà manyaanù; cikòlà biikàle ànu bàà mu èkèleeziyà. Kacya kabàyi ànu bakùmbàna mwà kucimuna bintu abi to. Nànsha Esawù kàvwa mwà kukùmbana to. Kàdi nànsha nàнку, bwà kwikala mutèndeledi, ùvwa ne cyà kwimanyina pa mmwènenenu wa meeji à mu mutù. Kì cintu cimwècimwè aci cidi èkèleeziyà wènza leelù ewu. “Netùlwe bulongolodi kampànda. Netùdisangè bònsò pàmwè. Netwenzè kasumbù kampànda, anyi kànsànkì, anyi cintu kampànda cyà mùshindù awu.”

⁷⁹ Nàнку awu ke mùdi èkèleeziyà ùkwàta mudimu leelù ewu, wa nyumà ne wa musunya, biikalè ànu byà mwomùmwè. Kì mbishintùlùke to, ne kabyàdyàkushintuluka nànsha.

⁸⁰ Cijila cyà Nzambi. Nzambi, bu mùdiye Nzambi, ùdi ùkùmbaja cyòci aci, Yèyè mwinè. Bu kakùyì ngènzàmpèkààtù to, kakùvwa kufwànyine kwikala. . . Kàvwa mwà kwikala Musùngidi nànsha. Kàdi Yèyè ùvwa Musùngidi ku cibangidilu, pa nàнку kakùvwa cintu nànsha cimwè civwà cijimìne to. Ne byambibwà Byèndè Yèyè bu Musùngidi, kì kulelaci ngènzàmpèkààtù, kùvwa ne cyà kwikala cintu kampànda civwà ne cyà kusùngidiibwa. Kumpàla kwà kwikalakù cintu kampànda cisùngidiibwe, kùvwa ne cyà kwikala cintu kampànda cijimìne. Ne bwakànè Bwèndè ne cijila Cyèndè! Bu ne kacya kakùvwakù kwanji kwikala—mubèèdi to, Yèyè kàvwakù mufwànyine kwikala mwondopi to. Kàdi kubangila ànu ku cibangidilu, ne ku cibangidilu, Yèyè ùvwakù kumpàlà kwà cibangidilu. Yèyè ùvwa mwondopi. Pa nàнку kakùvwa cintu nànsha cimwè cisaama to, pa nàнку cyàkalela mubèèdi, bwà Yèyè kumòna mwà kubòndopa, bwà kumwenza Yèyè mwondopi.

⁸¹ Mu Cipaapù cimwècimwè cyà Cijila amu mùdi mupàtùka lupàndu, mmupàtùka milawu. Munda mwà maamù umweumwe

ne taatù umwe mwàkapàtukà Yakòbò amu, mwàkapàtula Esawù. Nwamònu anyi? Nzambi. Yèyè kèna mwà kushintulula ndongamu Wendè to. Bìdi ne cyà kuya ànu mwomùmwe. Bufùki bwònsò nebùbwelèmu. Bùdi ne cyà kubwelamù. Nùmvù cìndi muswè kwamba anyi? Bìdi bikabwelamù. Kùdi ne cyà kwikala muntu kampànda mujimine, udi ne cyà kusungidiibwa. Nènku bu kàkùyi kufwànyine kwikalakù, Yèyè, Wendè... Yèyè bu Musungidi wàkenza cyòci aci. Ndòndò ùdi ùbìikila Ndòndò.

⁸² Byènze bu mwànà wa balùme mutekète mwena bwalu buntù ndonda abu awu, uvwa udyà ndundu wa ku crayons, ne ndundu wa ku dikàsà dyà dikalù, ùvwa ùkèngela soufre. Nènku bu mùvwàku ànu cintu kampànda munda amu cijinga soufre, kùvwa ne cyà kwikala soufre mwaba kampànda, dyàmbedi, mwenjùbwe. Kùvwa ne cyà kwanji kwikalakù soufre dyàmbedi kumpàla kwà kwikalakù dijinga munda mwèndè. Nènku yèyè, soufre ewu, kudimwèneshayè kùdiye, díbà adi yèyè kulwayè ku soufre.

⁸³ Mùshindù awu ki ùdi Nzambi Musungidi. Nènku bìvwa bìkèngela kwikale cintu kampànda cijimine, bwà Yèyè kucisungila, bwà kuMuvwiya Musungidi. Ki cyònsò cìdici cyènza, nkupàtula Nzambi patòoka. Cintu cyònsò, cyònsò cìdi munda Mwèndè; ki mmu muyiishi to, ki mmu èkèleeziyà to, ki mmu bulongolodi to, kàdi mmu Nzambi, bwà disungula kushàaladi dimàne dipwàngàne. Nwamònu anyi? Mmu Yèyè. Èyowà. Ba-Luthériens...

⁸⁴ Ne pashiishe tudi tumòna ditàpulula dikwàbò, cìvwa ng'Abraham ne Lotà. Bàvwa bàna bàà muntu. Kàdi Lotà ùvwa mwedi wa meeji à musunya. Yèyè ùvwa ànu a bwà wènda ukebangana ne cintu kampànda cyà cinène, cintu kampànda ciikàle ne dibàlakana dyàbùngì pambidi pààci. Ànu mùtù nsokò amu, mùndi mufwànyine kwamba, ùdi wènda wipacila misangu yònsò ànu bintu bìdi bìbàlakana. Nyumà awu kacya kàtu mwanji kulekela bantu to, leelù ewu. Nebèndè bàkèbangana ne... Bàyaaya mu cimenga, kàdi kabèèna mwà kwanyisha bwà kulwa mu kabutabuta bu aka nùnkù to. Nwamònu anyi? Mbaswe bwà èkèleeziyà mutàmbe bunène udi mu cimenga amu, mpaasàtà wa mamanya à mu mitù, mùdi bantu bàdi balwàta bu kapènzù bàya, mùdi mutàngidi wa cimenga ùya, mu cimenga. Cìcìdi ànu nyumà wa Esawù awu. Mu bulelelèlèlè bàvwa ne makenji à bwanàbutè, ànu kwònsò eku, bàdibìikila bòbò biinè mùdìbo Èkèleeziyà, kàdi bààkabùjìmija bwalu bààkabùdyombola. Kwèna mwà kufikisha bantu abu bwà kuyabò ku binù, ne kudila mwadi ne kulòmba Nzambi, kupàtuka ne kwenza masangisha à dyondopa, ne kutwàla dikèngeshiibwa dyà pa buloba, kupeta Nyumà Mwimpè to. Ne bòbò—bòbò kabàakucyènzakù to. Bàdi bàcìdyombola. Bàdi bacìbìikila ne “musumbà wa bansantu babunguluki bàà mu malaba.” Ànu cìdi Bible mwàmbe ne nebènzè aci. Bàdi bàcyènza bwalu ki ngiikàdilù wabò nyèyè awu. Nngiikàdilù's.

Ànu bu cikòlòlò ne nkuci, ngiikàdìlù yìbìdì. Bàdi bàcìjìngà bwalu's ki cidìbo. Kabàdyà, kashidi kààbò, kumònaku mukwàbò to, bwalu ki mbalediibwe bwà kucimòna to.

⁸⁵ Kàdi mukwàbò awu, kwèna mwà kumulama kule ne cyòci aci to, bwalu ndisungula dyà Nzambi to. Yèyè mmulediibwe bwà kwikala mulùme anyi mukàji wa nyumà. Cintu kampànda munda mwèndè cidi cìcìjìngà. Kaa, ndi ntèkemena ne eci cyàfikì mu mwaba utùdì mwà, unùdì mwà kumòna, cìndì—cìndì nswa kwamba, pànkaadi ncyòya mpindyewu apa. Mpindyewu Abraham. . .

⁸⁶ Vùlukàayi ne, bu mùvwàbo kacya bààlamakane pàmwè, èkèleeziyà wa mubidi ne èkèleeziyà wa nyumà, kacya kabàtukù bapetè dibènesha to. Yakòbò wàkabèneshiibwa ànu pàakatàpulukàye ne Esawù. Ne Abraham wàkabèneshiibwa ànu pàtápùkilàye ne Lotà.

⁸⁷ Lotà ùvwa ne kaadisangisha kèndè kakesè kàà disambila aku mu èkèleeziyà wèndè mwàmwa, mulongeshe bàna bèndè bàà balùme ne bàà bakàji, ne bakwàbò. Kàdi ùvwa ne mwoyi wà mùshindù awu, wà mùshindù wa ne, pàakayàye bwà kwakula bwà cikondo cyà nshìikidilu, kumusekabò.

⁸⁸ Cintu cimwècimwè aci leelù ewu! Wèwè wakula bwà dyondopa dyà kùdi Nzambi ne bukolè bwà Nzambi, ne bikwàbò, bàdi bàbìseka. N'nyumà umweumwe awu. Ki nyumà yìbìdì minène ayi, mu cibadi cyà ntèdeleelu, yidì mibùcikile buloba; mwena kwitabuuja ne mwena bupidyà, mwena kwitabuuja ne mwena kwitabuuja wa budìngibudìngì, muntu udi utentula mukwèndè awu. Mpindyewu pàakatàpuluka Abraham yèyè mwine. . .

⁸⁹ Nukààvwaku bamòne anyi? Yesù, mu dyakula Dyèndè bwà Dilwa, bwà Dilwa diibìdì, Wàkamba ne: “Ànu mwàkadibi mu matùkù à Noà, nebìikale bàdya, bànwà, baselangana, ne bàsèleshangana.” Kàdi pàakaakulàye bwà matùkù à Lotà, Yèyè kàakambakù cintu nànsha cimwè pa bwalu abu to. “Bu matùkù à Lotà,” aci mbwà dibuulula.

⁹⁰ Tàngilàayi cyàkenzekà mu matùkù à Lotà. Kùvwa Lotà ku Sodoma kwàka, musòmbe mucyankàme, bilondèshile mamanya à mu mutù, Kushààlayè ewu, umwe wa ku bantu banène bàà mu cimenga, nzujì, musòmbe mu biibi ùlumbulwisha bantu. Mukàjèndè ùvwa wa mu misùmbà yònsò yà bantu bàvwà mu cimenga amu ayi. Ne bàna bèndè bàà bakàji, ne bònsò bwàbò, basèdiibwe munkaci mwà bantu bàà luumù, beena mamanya à mu mutù, balonge bapilùke, beena meeji matwè, batàlàme. Ne Abraham ùvwa musòmbele mu ntentà mwinshì mwà mucì wà lusàngà. Kàdi dīngà ditùkù e kubèndelabò bùbìdì bwàbò bwenyi.

91 Kàdi kùvwa muiyiishi wa meeji à mu mutù wapakweka e kuyiishayè, ne kubàpàtula pambèlù. Tàngilàayi kùdì—tàngilàayi mukenji wà ne: “Pàtukàayi,” wàkambilàye Lotà awu’s.

92 Kàdi kàvwa mwà kubiikidiibwa bwà kupàtuka bu kabùyì bwà luse lwà Abraham to. Yèyè kwamba ne: “Ndi mwà kupeta bantu makùmi àtaanu, Udikù mwà kubàlama anyi? Ndikù mwà kupeta bantu makùmi àsàtù anyi? Ndiku mwà. . . Bu mèmè mwà kupeta dikùmi?” Ki pààkimanyinaye apu. Kàbidì kààkapetakù nànsha dikumi munkaci mwàbò to.

93 Kabyèna bikèmesha to ne: “Ànu mwàkadìbi mu matùkù à Noà.” Vùlukàayi ne, Noà kàvwa cifwànyikijilu cyà Èkèleeziyà to; Enòkà yèyè ngùvwa cifwànyikijilu, ewu ùvwa kàyi mupicile mu dikènga dikolè nànsha, kàdi wàkatentemunyiibwa kumpàla kwà dikènga dikolè kutwadijadi. Enòkà wàkaya Kumbelu, kààkapicile mu dikènga dikolè nànsha. Noà wàkapicilamù.

94 Mpindyewu, tàngilàayi ne ntèmà yònsò mpindyewu patùdì tutungunuka ne kubwela mu eci apa. Tàngilàayi nùmonè ne ncimanyinu cyà mùshindù kaayi civwà Abraham ne dikù dyèndè bapetè. Bààkapeta Citàmbe-mfùkilu. “Abraham!” Mmunyi mwàkamanyàYe ne ùvwa Abraham? “Mukàjèèbè Sarah, ùdi penyi?” Mmunyi mwàkamanyàYe ne ùvwa muselàngàne, anyi ne ùvwa ne mukàji, Sarah?

“Ùdi mu ntentà.”

95 Mpindyewu, Muntu musòmbe mwaba awu, ùdya munyìinyi, ùnwà mabèèle, ne ùdya dyàmpà dyà matalà, “Mukàjèèbè Sarah, ùdi penyi?” Mmunyi mùvwàYe mumanye cintu aci? Mmunyi mùvwàYe mucimanye? Elàayibi meeji pa bwalu abu. Nudi nubiikila. . . Nwènù bantu bàà nyumà, swàyì bwà eci cinùbwèlè. Mmunyi mùvwàYe mumanyè aci, pàvwàYe wènza maalu bu mwenyi, ne lupwishi ku bilàmbà Byèndè?

Nènku pààkambà Abraham ne: “Ùdi mu ntentà, paanyimà Pèèbè apu.”

96 Ki kwambaYè ne: “Nèngìikalè mwà. . .” “Mèmè, Mèmè,” mupinganyi muleeji muntu. “Mèmè,” Muntu ewu, Nzambì ùDimanyisha mu mubidi. Nzambì! Abraham wàkaMubiikila ne Elohim. “Mèmè, Nénkumwènèkèlè. Nèntungunukè ne kulama mulayi Wanyi. Ne bilondèshile cikondo cyà mwoyi, Nènnùmwenèkèlè, nènkù nenùpetè mwàna wa balùme Ùmvwà munwambile awu.” Nènku Abraham, ne bidimu lukàmà; Sarah, ne bidimu makùmi citèèmà.

97 Nènku Sarah, mumfundu mwàmwa mu ntentà; munkaci mwà ntentà yà mikesè mitwè ku yinaayi ayi, ntentà munène ùvwa lwà mu ndekeelu. Paanyimà pàà bilàmbà bikùdika, ùvwa munkaci mwà kutèeleja. Yèyè kuumvwa cyòci aci. Nènku munda mwà mwoyi wèndè kufùkishayè mimwemwe, wàmba ne: “Mèmè ewu, mukàji mukùlākaji wa bidimu lukàmà, ne mukalenge wanyi,” báyèndè, “mukalenge wanyi, wa bwalu mukùlākaji,

kàdi kwela meeji ne tudi bafwànyine kuumvwa milòwu pàmwè kàbidi, bu bansongà bàcidi bàbwelelaku mu dibàkà anyi? Kaa, mmunyi mùvwàci mwà kwenzeka?” Nènku kwenzayè bu wáfùkishi mimwemwe.

⁹⁸ Ùvwa ne nyimà Wendè mwela ku ntentà. KwambaYè ne: “Bwà cinyi wàsekì?” Kaa, mwanèètù, s’ki bwalu mbwòbù abu’s!

⁹⁹ Tàngilàayi èkèleeziyà wa musunya mùdibo bènda bàmuiisha Èvànjeeliyò. Billy Graham wa cyena leelù ne bakwàbò abu kuntu kwàka munkaci mwà kuyiisha Èvànjeeliyò ne: “Pàtukaàyimù!” Kàdi bàakalwa anyi? To. Bakesè, bakesè, bakesè menemene.

¹⁰⁰ Tàngilàayi musumbà wà Abraham, bàbìkidiibwe bwà kupàtuka abu. Mpindyewu mònaayi. Ne kumupèèshaYe cimanyinu eci, ne yèyè kuMwitabuuja. Ne Wàkajìmina kumpalà kwèndè, e kuyayè. Kaa, mùshindù mena útùbi misangu yònsò ànu ditàpuluka, bàbìkidiibwe bwà kupàtuka!

¹⁰¹ Mpindyewu, nyumà yìbidi eyi. Bwà kulwijakaja neenù, bwà kulwijakaja mpindyewu bwà kufika ku mwaba wànyi ùndi muswè bwà nwènù kumòna. Misumbà yìbidi eyi mmidisangè pàmwè, mu bikondo byònsò bipite, kwambwila ànu ku mbangilu mene kwà bikondo aku; èkèleeziyà wa mu mubidi, èkèleeziyà wa nyumà. Bàakapicila mu Dipungila Dikùlukulu, bàakapicila mu Dipungila Dipyadipyà, ne bàcidi bènda bàpweka too ne leelù.

¹⁰² Mpindyewu, kùkaadi kupite bidimu bitwè ku binunu bìbidi, e kulwaci ku katòngòbèlè, e kubàndaci mu bantu bàbidi: umwe wabò, Yesù Kilistò; mukwàbò, Yudaàsà Mpongoloki. Mpindyewu, Yesù wàkamba bwà Dilwa, dyà Dilwa Dyèndè diibidi, ne nyumà yìbidi eyi yìvwa mwà kwikala mishìlàngàne bikolè ne ciwàye kale wàwa. Mpindyewu apa ki mwaba ùndi muswè bwà nwènù kulwàta bivwàlù byènù—byènù byà Butùmbi. Nyumà yìbidi eyi neyikalè mishìlàngàne. Bwalu, Sàtaanà wàkalwa kusòmbela mu muntu uvwa cidimba cyà èkèleeziyà, Yudaàsà Mpongoloki, wàkasòmbela mu èkèleeziyà wa musunya, ne ùvwa mulunda wa èkèleeziyà cikondo cyònsò. Kàdi wàkabwela ne—ne kushimayè, anyi kwelayè meeji ne ùvwa munkaci mwà kushima mwanààbò. Wàkabwela kudìngìdija bu ùvwa umwe wabò; kulabulayè bintu bìmpè byà Nzambi, kubwela bulùdi mu Nyumà, ùmweka bu nàнку, wàkaya kayiisha Èvànjeeliyò, ne kwipata badémons. Kàdi munda mwèndè, dìbà dyònsò, yèyè ùvwa Yudaàsà, ànu kwònsò kwònsò eku. Bible mmwambè ne: “Wàkalediibwa mwànà wa dibùtuka.”

¹⁰³ Mpindyewu vùlukàayi ne, kùdi èkèleeziyà wa musunya kale wàwa, Esawù, Bàfaalèsà ne Basàdoka.

¹⁰⁴ Kàdi tàngilàayi nsongàalùme ewu udi udyèlela meeji nkàayèndè ànu bu . . . Yèyè neèndè ne Mukenji ewu bwà katanci kakesè, kàdi ki mmuswè bwà kutwàPu byanza bikolè to. Nwamònu nyumà ayi anyi? Yesù wàkamba ne: “Neyikalè

pabwìpì menemene ne cintu cilelèlè, neyiseeswishè Basungula mene,” Basungula, bu nwènù mwà kucimòna ne: “bu ne bivwa mwà kwenzeka.” Kàdi kabyèna mwà kwenzeka to. Nwamònu’s, neyiseeswishè.

105 Mpindyewu tàngilàayi, kàyi ànu èkèleeziyà wa musunya to, ewu udi mupàtùkemù, ngenzèlù wa ciibidilu wa èkèleeziyà wa musunya, musùmbà wà Esawù.

106 Tudi bapetè mpindyewu musùmbà wà beena Yudaàsa, bàdì ne budimù bwà wòò, beena budimù bwà wòò kutàmba, bàfika too ne mu mabènesha. Ànu bu mu Ebèlù 6 ne 10 amu, mùshindù wàkambàye ne: “Bamane kushàalaku baabanyanganyi ne baalabudi bàà makolè à buloba bùlwalwà, ne benzè bintu byònsò ebi; bu ne. . .nèku dîbà adi pìikalàbi ne mbaakidile dimanya dyà Bulelèlè, kàdi pashiishe bóbò babùbènge ku budiswilè.” “Ku budiswilè,” ncinyi aci? “Kuvwija Mashi à cipungidi, àvwàbo bajidiibwe ku wòwò awu, cintu cidi kaciyi cyà cijila to.”

107 Anyishaayi nnupè cileejilu. Ki cyòci eci. Ki muntu ewu’s, mmuntu mwimpè, nsongàalùmè mulenga kumòna. Mmubiikidiibwe, ùdi ùmwà mu mwoyi wèndè ne mmuswè kwikala mwambi. Èyo, ùdi wítaba Yesù bu Musùngidi wèndè wa sungasunga. Nnsongàalùmè mulenga kumòna, cakwèna muntu udi mwà kumubanda ne bwalu to. Paanyimà pàà cikondo, cyenabwalu cyà dijidiibwa. Muntu mulùme ùdi wàlakana pàdiye ùtàngila bakàjì apu. Yèyè. . .Cidi munda mwèndè. Nwamònu anyi? Nèku dîbà adi, cintu cyàlondà, pàmwàpa ùvwa ùnwe mfwankà, ne ùvwa muswè kunwà mfwankà. Pàmwàpa mmuswè kutwà mubèlè wà mfranga. Pàmwàpa mmuswè kwenza cintu kampànda cyà cibì. Yèyè mmumanyè ne kabivwa bìkèngela bwà kwenzaye cyòci aci to, ki yèyè kwamba ne: “Éyi Nzambì, ùndàbè Mashi à Yesù, ne ùnjidilè.”

108 Ke kujidiibwayè. Ùdi mwà kwela mbilà, kutùmbisha Mukalenge, kwenza bintu kampànda, kàbidì, kupàtuka ne kukenza cintu. Vùlukàayi, Yesù wàkamba ne bàà mùshindù awu nebìikalèku mu ditùkù adi. “Bààbùngi nebàlwe bàmba ne: ‘Mukalenge, ncyènakù mwambe cipròfetà, muyiishè anyi? Ncyènakù mwipàte badémòns, mu Dìna Dyèbè anyi?’” Yesù wàkamba ne: “‘Ncivwa nànsha mumanyè to, nwènù beena mudimu bàà bubì.’” Nwamònu’s, ki bóbò abu.

109 Mpindyewu tàngilàayi eci mpindyewu. Tudi tufika ku dipandulula dyà dyà lusukì mu tupesa miliyo lukàma ne kwangata kàmwè kàatù, ku lusongo menemene lwà Èvànjeeliyò: “Nditwè kutàmba mwelè wa mvità wa nseke yibidi, dikòsa too ne ku ditàpulula dyà mufùbà, ne Dijinguludi!” Àlèluuyàh! Nzambì, lekèlaku dibwèlè. “Dijinguludi dyà meeji à mu mutù.” Ki Èvànjeeliyò nyèyè awu, Bukolè bwà Nzambì. Dìyi dyà Nzambì dimwènèshiibwe ki Èvànjeeliyò.

Wèwè udi wamba ne: “Bible mmwambe. Aci’s—aci’s n’Diyi dyà Nzambi.”

110 Èè, Dìyì dimwènèshìibwe ng’Èvànjeeliyò. Èvànjeeliyò mmulwè kutùdi kì nku Dìyì nkàayadi to, kàdi ku bukolè ne dileeja dyà patòòke dyà Nyumà Mwîmpè, bwà kuleeja patòòke Bukolè, kuvwija Èvànjeeliyò ne mwoyi.

111 Pângàakayà ku Inde, mwèpiskòpò wa mutàmbridile wa—wa èkèleeziyà wa ba-Méthodistes kupàtukaye, wamba ne: “Mukalenge Branham, katwèna baswè kumanya ní ncinyi ní ncinyi cidi citàngila mpàndànjlà kampànda nànsha. Twètù tudi bamanyè byàbúngi pa bìdi bìtàngila Bible kutàmba munùdi nwènù mwà kumanya.” Yèyè ne: “Twètù tuvwa èkèleeziyà, ne basòmbe mwaba ewu bidimu binunu bibìdi kumpàla kwà nwènù kwikala ditùnga.” Ncyà bushùwà. Kàdi kwambayè ne: “Tudi bùmvwè ne Nzambi mmunwendèle ne mutwàle dipà didì mwà kwenza ne Bible ewu ìkalè ne mwoyi.” Yèyè ne: “Kì cidi cikoka ntèmà yètù aci’s.” Kaa, ekèlekèle! Nwamònu’s, muntu awu ùvwa mwànà, kàyi mwikùlù to, bu mwàkambà Davìdì. Nwamònu anyì? “Tudi baswè kumanya. Ncilelèlà anyì?”

112 Mémè ne: “Cyà bushùwà, ncyà bushùwà. ‘Yesù Kilistò umweumwe awu makèlèlèlà, leelù, too ne kashidi.’”

113 Mpindyewu, mumònaayi, èkèleeziyà wà mubidi ùdi ùkèngesha èkèleeziyà wa nyumà. Mpindyewu, tudi tujandula dībà adi ne Yudaàsà ùdi munkaci mwà kudyàmba mùdiye mwanèètù, mwanèètù kampànda, ne pashiishe kubàndaye ne kutungunukayè ndekeelu wa byònsò too ne mu katòngòbèlà.

114 Mpindyewu tàngilàayi muiishi wa citende ewu. Yèyè ùdi ùlwa mu mwaba kampànda, wamba ne: “Mukalenge, ndi ntàngila bakàjì. Kabìvwa bikèngela bwà mémè kwenza nàнку to. Ndi, nudi bamanyè’s, mwenzè bintu byà pa buloba. Kabìvwa bikèngela bwà mémè kwenza nàнку to. Mvwa munkaci mwà kutùùla mfrangà yànyì ku mbilu yà pa tùbalù. Nci—ncivwa ne cyà kwenza nàнку nànsha. Mvwa—mvwa ngenza kuya mu sèndèma yà butùkù. Ncivwa ne cyà kwenza nàнку to. Ndi nsànkila bimfwànyì byà busenji ne bintu byà mùshindù awu, ndi mubilamike mu cibambalu cyànyì. Ncivwa ne cyà kwenza nàнку nànsha. Kì bintu byà pa buloba mbyòbì abi. Njidilèku, Mukalenge!”

115 Kì Mukalenge kwamba ne: “Èyo, Mémè nèngènzè nàнку.” Yèyè ùdi ùmulaaba Mashi à Yesù Kilistò ne ùmujidila.

116 Pashiishe, pàdiye wènza cyòci aci, dilòlò kampànda ùpicila mwaba awu e kuumvwayè cintu kampànda. Kì kuyayè katèèleja. Yèyè kuumvwa bwà dibàtiiza dyà Nyumà Mwîmpè, dyujiibwa dyà Nyumà. Pashiishe ùdi ùtàngilamù ne: “Kaa, ekèlekèle, abi’s mbilenga menemene’s wè! Kàdi, amba tùng, aci ncifwànyine kunyangakaja mudimu wànyì wà bwambi bu mémè mwà kuciyiisha. Aci’s cidi mwà kufikisha mukàjàanyì ku dinyemaye

kumbèlù. Mbafwànyine kungiipata mu èkèleeziyà wanyì bu mèmè mukabwele mu cyôci aci. Kaa, bivwa bitàmbidile bwimpè mèmè kushiyangana naaci. Kàdi ndekèlaayi ngooshèmu dísù. Èyowà, aci's m'Bulelèlà, m'Bible."

117 Èè, bu mwambi kampànda mwendè luumù, mumanyike buloba bujimà, bàvwa bamusangàne matùkù mashààle aa (kùdì muntu kampànda uvwa naanyi mu Puerto Rico mwàmwa) ku binu byèndè, wàkula mu myakulu, mu Londres, mu Angleterre; muntu wa bukolè, umwe wa ku batangadiki bàà batàmbe bunène bàà pa buloba leelù ewu. Nènku muntu ewu, bu mùdì mwanààbò naanyi mwab'ewu, muntu mùlè tètè ne Nyumà, kuyayè kùdiyè e kwamba ne: "Kaa, mwanètù, ki cyôci aci's!"

118 Yèyè ne: "Ndi mumanyè nànkù. Ndi mumanyè nànkù. Kàdi, tàngilà, lekèlà nkwàmbilèku cintu kampànda."

119 Yèyè kwamba ne: "Ciyiishààku mpindyewu. Ciyiishààku. Ki dîbà ndyôdi edi. Ne bwenzeji bwèbè abu, udi mwà kunyùkusha bàà pa buloba."

120 Yèyè kwamba ne: "To, ncyèna mwà kuciyiisha to. Nwamònu's, è—èkèleeziyà ùdi mwà kungiipata. Ncyèna mwà kuyiisha aci to. Ncyèna mwà kucyènza to." Kaa, mwanètù!

121 "Mumanè kupe- . . . mumanè kwikala mujidiibwè ne mufikè too ne kudipeta dimanya dyà Bulelèlà, mutàngileMù, mumòne ne Ncyà bushùwà; kàdi kubènga, pa kumòna ne bàdi bàpoopela bóbò biinè Mwánà wa Nzambì ku nkùrusè, ne kuMwadija pa bundu bwà patòoke, bùmva bundù bwà Èvànjeeliyò."

122 Pòlò wàkamba ne: "Mèmè ncyèna ngùmva bundù bwà Èvànjeeliyò wa Yesù Kilistò to, bwalu Yèyè ki Bukolè bwà Nzambì bwà lupàndu." M'Bukolè bwà Nzambì bùkwàcila mudimu munkaci mwà Èkèleeziyà Wendè.

123 Kàdi wàkamba ne: "Ncyènakù mwà kucyènza to." Muntu ewu's ne: "Bàvwa mwà kwela meeji ne mèmè mvwa mwena mpenta. Bàvwa bafwànyine kungenza. . ." Kwambayè ne: "Luumù lwànyì—lwànyì lùvwa mwà kunyanguka." Kaa, mwanètù!

124 Ncyèna ne luumù to. Ndi ngèèla meeji bwà luumù Lwèndè. Luumù Lwèndè, ki Yèyè awu.

125 Kàdi tàngilàayi mùdibo batwàngàne naaCì nkundù, nudi bamanyè's: "Kàdi kuvwija Mashì à cipungidi àvwaye mujidiibwekù awu, cintu cyàkamujidilà ne kumupàtula mu maalù à pa buloba, ne kuteeta kumutèeka kumutù mu Mwaba ewu. Ne pashiishe ùdi wòshaPù dísù, ne mwikàle ne dimanya dyàWù. Bwà kuÈla nyimà, kí nkushààle kàbidi mulàmbù wà mpèkaatù to," mùdì Bible mwàmbè, "kàdi dindila dyà cilumbulwidi didi dikwàcisha bôwà ne kapyà kàà cinyongopelu kàvwà ne cyà kwikalakù, kiikalàku, kiikalà ne cyà kubùtula mulwishi. 'Bwalu busombwedi mbwànyì,' mmùdì Mukalenge

wàmba. Ewu uvwa udyombola mukenji wà Mòsà, ùvwà ùfwa kakùyi luse to, ku bujaadiki bwà bamònyi bàbidi anyi bàsàtù. Nebitambè kwikala dinyoka dyà munyi, ne dinyoka ditambe kukola bishi, diikale dikùmbànyine, mwambi udi mudyatakàje Mashi à Yesù Kilistò mwinshi mwà makàsà èndè, paanyimà pàà mumanè kupeta dimanya dyà Bulelèlà, ne kuDivwija bu cintu cidi kaciyi cyà cijila to.” Yoyòyò!

¹²⁶ Nwamònu mwaba utùdi neenù anyi? Yesù wàkamba ne: “Nwadimukaayi.” Nwamònu mùvwà Yudààsà anyi? Yéyè ùvwà ànu naabò. Yéyè ùvwà Esawù awu, muvwijiibwe mutàmba bunène mu cikondo eci. Úvwà museeswishanganyi, mutentudyanganyi, muvwijiibwe mutàmbe bunène mu cikondo eci. Ki yéyè udi ubànde ewu, cyàkàbidi, too ne ku diikala mwanàabò ne Yesù, ùvwà udyàmba mùvwàye mwanàabò awu. Kàdi mu mwoyi wèndè, yéyè ùvwà ne èkéleeziyà wa kale wa musunya dîbà dyònsò, bwalu ki mwaba wàkasùmbishàye Yesù awu. Wàkasùmbisha Yesù, bukenji bwèndè bwà bwanàbutè, ànu mwàkenzà Esawù menemene bwà dilòngò dyà musàbù. Wàkasùmbisha bukenji bwèndè bwà bwanàbutè bwà bìnjànjà byà mfranga makumi àsàtù.

¹²⁷ Balùme ne bakàji bààbùngi leelù ewu mbasùmbishe bwàbò bukenji bwà bwanàbutè bwà dimanyika kampànda, cintu kampànda cikesè cyà pa buloba cyùdi kacya kùyi mwànji kucimuna to; bakàji kampànda, batekète, bàdilaaba bilaabu, ne babebula nsukì, bàlwàta tulàmbà twìpi; balùme, bwà minèkù mikesè yà manyaanù bènda bànwa mfwankà, bintu kampànda byà pa buloba. “Wèwè munangè buloba anyi bintu byà pa buloba, dinanga dyà Nzambì kadyèna munda mwèbè to,” mwàmbambà Bible.

¹²⁸ Neyènà muswè kunùtapa ku mwoyi to, kàdi tudi batàngile ku ndekeelu. Tudi munkaci mwà kubànda mpindyewu, tudi munkaci mwà kubànda ku cibàndilu lùkàsàlùkàsà mpindyewu.

¹²⁹ Nwamònu mùdibi anyi? Bàdi bàcyènza. Mbadyànjlila kulongolola. Bàvwà bafwànyine kutentula ne kwikala ànu ne kalolo ne badìpwekèshe, ànu pabwìpi menemene, bu mùdi beena Kilistò, batwàngàne nkundù bafwànyine kuseeswisha ne basungula mene; kàdi ku mamuma àbò nkunwàbàmanyina.

¹³⁰ Mukàji kampànda udi muvwàle kapùtulù, kàtukù ùmwèka bu mwena Kilistò, kùndi nànsha. Bible mmwàmbe ne: “Ncintu cyà mpèkaatù ne cintu cyà bundù bwà mukàji kukòsa nsukì yèndè.” Mukàji umwèpelè mu Bible wàkadilaaba bilaau mumpàla mwèndè, ùvwà Izàbèlà.

¹³¹ Kàdi twambè bishi bwà balùme, nwènù balùme bàdi ne cyà kwikala beena Kilistò, kàdi nulekela bakàji bèenù bènza ciinè aci? Pààbi, Nzambì neànwimikile bujitu bwà cyòci aci! Kì muntu to! Wa musunya! “Kaa, mèmè’s nèmpatukè dîbà adi ne nkashàale mwena èkéleeziyà ewu.” [Katùpà kàà mukàbà wà méyi munda

mutupù—Muf.] “. . .nwènu elàayi meeji pa bwalu abu.” Aci’s ke civwà Mifundu myàmbe ne bàvwa ne cyà kwenza ncyôci aci, ne ke cyôci aci menemene cidìbo bènzè. Ne ke cyôci cyènzàbo, kudyà cibàngà!

¹³² Muntu kampànda kwambàye ne: “Billy, wèwè kùyì mwimànyìke aci to, neùyìishè bantu bônso lùbilu.”

¹³³ Kùdi Cintu cimwèpelè cìikalà kaciyi mwà kuya to, Nyumà Mwimpè, bwalu N’Diyi Dyèndè. Ne mwena kwitabuuja mulelèlà mudyànjila kulongolola kàkunyaema lùbilu kuya to, bwalu Cidi Cyàkudyà bwà musùukà wèndè. Yèyè mmuCinange. Kakwèna cintu nànsha cimwè cidì mwà kumupangishaCì to. Neènzè ní ncinyi ní ncinyi cyônso eci, ànu bu Yakòbò, kàdi yèyè mmuswè bukenji bwà bwanàbutè abu. Yèyè neìmanè mwaba awu. Nànsha byòbi bimumpangishe balunda bônso bàdiye naabò, nànsha bimujimijile mudimu wèndè, nànsha bimumpangishè bumambàlà bwèndè bwà èkèleeziyà, nànsha bimumpangishè bintu byônso. Yèyè neàshàale ànu kacya wàbùkwàtà, bwalu kèna mwà kubùlekela to. Kùdi cintu kampànda munda mwèndè, cìkwàta mudimu, ndòndò ùbiikila Ndòndò. Kaa, s’ki bwalu mbwòbù abu’s, cintu kampànda munda mwèndè!

¹³⁴ Tàngilàayi, cintu kanà cyônso cinùdi baswè kupeta mu Bible, ne kucyàmbula mwab’ewu, alùkilaayi mu Genèsè bwà kumòna mwaba ùvwàci citooyìkile, kumòna mwaba ùdici cìkafika. Nyumà yònsò ne nkwaka leelù ewu bìdi byàlukila mu Genèsè. Kì citùdi bènzè aci, bwà kunùshindikila bintu ebi binùdi munkaci mwà kumòna, balunda bàanyi. Kanùpu aci mwoyi to. Kanùcilekèdìku cìnùpicila pa mitù yènù to. Cìlekèlaayi cìtùkinè munda mwènù. Abi’s ke bintu byà Nzambì. Cidi cìfika mu katòngòbèlà; ne Yesù wàkadyànjila kwamba ne civwa mwà kulwa ku katòngòbèlà cyàkàbìdì mu matùkù à ndekeelu, ne civwa ne kwenzekela ku eci: Citampì cyà Nzambì, ne cimanyinu cyà nyama wa lwonji; makolè àbìdì à nyumà adi àkwàta mudimu pàmwè.

¹³⁵ Mpindyewu, muntu kanà yònsò ewu mmumanyè ne Cìtampì cyà Nzambì ki bukenji bwà bwànàbutè, dibàtiiza dyà Nyumà Mwimpè. Efèsò 4.30, ùdi wàmba ne: “Kanùbungamiji Nyumà Mwimpè wa Nzambì, unùdi batwìbwe nèndè citampì too ne ku ditùkù dyà bupikudi bwènù nànsha.” Pàvwàbo balediibwe cyàkàbìdì, bàvwa bùle tètè ne Nyumà Mwimpè. Nyumà Mwimpè n’Dilediibwa dipyadipyà, tуди bamanyè nàнку. Wèwè udi—wèwè udi mwimita ku Nyumà, mèmè nèngùtabè aci. Kàdi too ne paùdi ulediibwa!

¹³⁶ Pàdi mwànà wimiciibwa mu difù dyà mamwèndè, ùdi ne mwoyi wà mùngà mùshindù. Aci’s mmwoyi, ne twèndè tukèsè. . . tubùlù tukèsè twà mashi tùdi mu mubidi wèndè tùdi tùdìnyònda ne tùtutakana ne tùtùpika mùshindù awu. Kàdi pàdiye ùlediibwa, ùdi ne. . . [Mwanèètù Branham ùdi ùtuutakaja

byanza byèndè—Muf.] mùshindù awu, ne pashìshe ùpàtuka wèla lubilà, ùlwa musùùkà ùdi ne mwoyi.

¹³⁷ Ne mwànà wa mu dibòko ùdi mwà kuya mu èkèleeziyà ne kwamba ne: “Kaa, ndi ngiitabuuja mu èkèleeziyà. Mèmè—mèmè nènye, nèngènzè *cikampànda*. Ne ndi mwîmpè. . . Ndi muswè kwenza maalu mîmpè, ndi muswè kwenza maalu majaanàmè.” Kàdi cidiye ùkèngela ndipì dyà Èvànjeeliyò bwà kumùtàbuluja, bwà kwelaye lubilà bwà Mwoyi wà Cyendèlèlè; ne Nyumà Mwîmpè ùdi ùkòbola, mutùYe kacya kàyì mwànji kukòbola dyàmbedi nànsha. Dìbà adi ùdi cifùkiibwà cipyacipyà, mmulela kùdi Nyumà. Pashìshe ùbanga kukola, ùkwàta mudimu, ne mwikàle ne bumùntù bwèndè mu Nzambi; nwamònu’s, ànu bu mùdi mwànà wa mu dibòkò amu, mwànà wa mu mubidi emu, ùdi ne bumùntù bwèndè pa buloba apa.

¹³⁸ Dìbà adi ntentà wa pa buloba ewu yèyè munyanguke, tudi ne mukwàbò mwindile, nwamònu’s. Ànu menemene mùvwà mubidi wà mu bufùki awu mupàtùke, kùvwà mubidi wà nyumà bwà kuwàkidila pàakapàtukawu munda mwà mamwàwù apu. Ne pàdiwu ùpàtuka munda mwà mamwàwù, buloba, cidiwù aci, ùdi ùsanganyibwa mu difù mwàbù mpindyewu, ùtwa mikèmu, ùdila, (Èyi Nzambi!), ùtwa mikèmu, ùkwàta mudimu mukolè, wènda ùkùlakaja, ne màsaamà, ne bintu byònsò bìikàle bìwùtácisha, kàdi nyumà udi munda mwàwù awu ùdi ujinga buloba bùdi dyàmwàmwa dyà musùlù. Ùdi munkaci mwà kutwà mikèmu, ùdinyonda, (èyowà’s, mukalenge) bwalu kùdi mwoyi munda amu udi ùshààla kashidi. Ùdi mu mubidi ùdi ne cyà kufwà. Nènku mîngà misangu, ànu mùvwà maamù mulelè mwànà wa mu mubidi awu, ne mubidi wà nyumà kuwàngata amu; buloba nebùmatè, ne mubidi wà mu bufùki newùmatè, ne mubidi wà misunya. . . anyì mubidi wà mu dyulu newùwakidile dyàmwàmwa dyàdya. Ntentà wa pa buloba ewu yèyè munyanguke, tudi ne mukwàbò mwindile. Ki bwà cinyi udi upwà mwoyi bintu byà pa buloba. Mbifwè, bwèbè wèwè. Ki Nyumà awu’s.

Mpindyewu tàngilàayi nùmonè patùdi tutùngunuka mpindyewu apa, nyumà yibidi eyi.

¹³⁹ Nyumà Mwîmpè ki Dilediibwa dipyadipyà, tudi bamanyè aci. Nkwikala mulediibwe cyàkàbidi, kùdi Nyumà wa Nzambi. Mùshindù awu ke wùdi mulediibwè, ku Nyumà. Mulediibwe kùdi Nyumà, ki Dilediibwa dipyadipyà ndyòdi adi. Èyo. Udi mwimita kùdi Nyumà; dìbà adi paùdi ulediibwa kùdi Nyumà, udi mùjùbwe tètè ne Nyumà Mwîmpè. Èyo.

¹⁴⁰ Pàdi yibidi eyi mu buloba, wa mubidi ne wa nyumà, mîngà misangu wa. . . Nkààdi mumòne eci. Mpindyewu bwà kwoya, ndi muswè kufika ku dyoya mpindewu, mu kwamba eci bwà tusunsa tukesè. Mu mubidi anyì mu nyumà, ni ngewu. . . Mpindyewu ndi

ntèkemena ne muntu yònsò ùdi ùkwàta cyôci eci. Mpindyewu tuùkijaayi ne mwènù mwònsò ne kaneemu kààbùngì.

141 Mpindyewu, nukààdikù kacya bamòne eci anyi? Nudi numòna mu èkèleeziyà yètù leelù ewu, nànsha mene mu bisumbu mutùdi batàpùlùke ne bènze malongolodi amu; nènku tudi bamòne byònsò ebi. Nènku nuvwa numòna muntu kampànda wàngata Mufundu kampànda, nènku, mwanètù, muntu awu ùdi mwà kwàngata Mufundu awu ne kuwùvwija ne mwoyi cyàkàbìdì, kuwùvwija ànu ne mwoyi menemene mùvwàwu mulayiibwe mu Bible. Ne muntu wàlonda neàmòne ùcyènza, nènku neàsemene pabwìpi ne neàteete kucyènza, kàdi kupangilayè. Ndi ntèkemena ne nudi munkaci mwà kubala mpindyewu. Yèyè neàpangilè. Bwà cinyi? Mufundù kì mmusonsòdiibwe kùdiye to. Yèyè ùdi ùteeta ànu bwà kutentula cyanààna. Ùdi ùteeta kwenza maalu bu cintu kampànda. Kàvwa...Èè, pàmwápa ùvwa mutùmùibwe kùdi muntu. Pàmwápa muntu kampànda kwambayè ne: “Èè, udi mwà kwenza cintu cimwècimwè aci.” Nwamònu’s, ànu mùvwà Yesù mwàmbe ne neciikalè mùshindù ewu. Bible ùdi ùdyanjila kucyàmbe mu matùkù à ndekeelu ne: “Ànu mùvwà Yanè ne Yambèlè bakàndàmèene Mòsa amu.”

142 Ki Mòsa awu mwimàne, ne ki Yambèlè awu mwimàne. Ke Mòsa kwela dikombo dyèndè panshi, e kwandamukadi nyoka. “Mòna’s,” mwàkambà Pàlò, “Iwàku apa, Yambèlè, udi mwà kwenza cintu cimwècimwè aci.” Ki kwenzayè nànkù, nwamònu’s. Kàdi cyàkenzekà ncinyi? Pashiishe ke dikombo dyà Mòsa kuminadi dyèndè. Nwamònu’s, byàkamwèneshiibwa patòoke. Dikombo dyèndè òvwa penyi?

143 Byenze ànu bu mmwènenu mutàmbe cyumvwilu. Mbyènze ànu bu mùdì àmwè à ku maalu à mikishi aa. Mbyènzè ànu bu yimwè uyà ku maèkèleeziyà mùdìbo bitabuujà ngitàbijilù wà mubidi, bikaadi bipicile matùkù. Bintu byà...Bàdi bàmba ne: “Mòna’s, aci civwa mbwà ditùkù dikwàbò.” Mmipàtùke yònsò pàmwè. Kàdi tàngilàayi nyumà ewu mu matùkù à ndekeelu emu mùdiye wènda ùya bwà kutentula Nyumà mulelèlè. Nwamònu anyi? Ki mwabà ùdi lutàtù lwènù lùfùmìna ngwòwò awu. Menemene ànu bu wà mulelèlè awu, nwamònu’s; kàdi kàvwa mwà kucileejà patòoke to, kàvwa mwà kwenza ne cikwatè to, kàvwa mwà kwenza ne cishaale matùkù àbùngì to. Éyi Nzambì!

144 Bantu bàdi bàlwa bàmba ne: “Ndi ne Nyumà Mwimpè, mémè pàanyi.” Tàngilàayi mùshindù ùdìbo bènda; kaciyèna cinènga kuumukila ku ditàbuluja ne ku dikwàbò, anyi ku disangisha ne ku dikwàbò to. Cyàkadimwèneshà, kabàvwa n’Endè to. Mulùme yèyè mulediibwe kùdi Nyumà wa Nzambì, anyi mukàji, bàdi ne mamuma à Nyumà. Bàdi bènda mu difwàna dyà Nzambì. Bàdi bàsòmbe nsòmbe awu. Nwamònu anyi? Bàdi bàditòla ntàntà mule ne bintu byà pa buloba. Nzambì ùdi ùkwàta mudimu munda mwàbò ne ùDimwèneshilamù, ne ùshindika ne

Yèyè n'Nzambi ùdi ùkwàcilamù mudimu. Cikwàbò nditentula. Nwamònu anyi?

¹⁴⁵ Ditentula, ki dyònsò òwàkù kwònsò eku, munkaci mwà kutentula. Tàngilàayi Ishàmèlà, ne Izàkà; ne byònsò abi, nwamònu's, ùtentula. Tàngilàayi mupròfeta Mòsà, ne tàngilàayi mupròfeta Baalàmà. Nwamònu anyi? Nudi numòna mwàkapwekàbo's! Tàngilàayi Yudaàsà, ne tàngilàayi Yesù.

¹⁴⁶ Ne Yesù ùdi ùdyanjila kwamba ne Nyumà Mwímpè ewu, mu matùkù à ndekeelu, ùwà mwà kwikala Cítampì cyà Nzambi. Mpindyewu, ncinyi cìwà cìfwànyine kwikala cimanyinu cyà nyama wa lwonji? Cìwà cìfwànyine kwikala dibènga dyà Cítampì cyà Nzambi. Bwalu, bònsò bàwà kabàyi ne Cítampì cyà Nzambi aci bàwà ne cimanyinu cyà nyama wa lwonji to. Nèku pìikalàbi mbimanyinu bìbìdì byà nyumà, cìmwè cyà kudibi neciikale cimanyinu cilelèlà cyà Nzambi, cikwàbò neciikakè ditombokela dyà Nzambi. Nudikù mwà kucimòna anyi?

¹⁴⁷ Tàngilàayi cimanyinu mu Dipungila Dikùlukulu. Pàwà mpungi ùdila, bwà cyanga, bidimu byàbùngì byònsò abi, ba—bapika bàwà bàpàtuka badiikàdile bwalu mpungi ùwà mudile. Èè, muntu yònsò ùwà muswè kwikala mudishikàmìne awu, ùwà mwà kuya. Kàdi bàmwè bàà kùdìbo, bàwà banangè kwikala bapika, ki kuyabò naabò ku cyoshelu ne mu dikunji dyà èkèleeziyà, ne bàbàtùbula dicitì ne mulonda. Ne bàwà batwìbwe cimanyinu bwà kashidi, bàwà bàkwàcila mfùmù awu mudimu bwà kashidi.

¹⁴⁸ Nèku leelù ewu nenùtèèleje mukenji wà Èvànjeeliyò pa Bulelèlà ne: “Mpindyewu wèwè udi mwà kwikala mudishikàmìne pawikala muswè,” Nzambi ngudi wakula neebè awu. Nèku dībà dyùdi ufika ku mikàlu eku ne ùtàngila dyàmwàmwa, ne mwikàle ne dimanya dyà Bulelèlà, kàdi pashìshe kucyùnguluka, ùdi ùkutùbùla dicitì ne newikale mwena kwitabuujà wa dimanya dyà mu mutù misangu yònsò. Newikale mutèndeledì ne uya mu èkèleeziyà, kàdi kùyì upetaku Nyumà Mwímpè nànsha. Nwamònu's, dībà adi udi usadila muntu awu matùkù èbè ònsò à mwoyi. Mpindyewu, cimanyinu cyà nyama wa lwonji, anyi Cítampì cyà Nzambi. Nèku tudi twenda tusemena pabwìpì menemene.

¹⁴⁹ Mpindyewu, tàngilàayi, Dìyi didi ne cyà kwikala disonsòdìbwe: ùDiteèleja, ùDìjingulula, ne wenza cìdìDi dyàmba. Bantu bààbùngì nebàtèèleje, kàdi kabààkuDìjingulula to.

Nzambi neàmbe ne: “Ke dībà dyèbè edi.”

¹⁵⁰ “Ncyèna mufwànyine kwikala munsantu mubùnguluki wa mu malaba to. Ncyèna—ncyèna muswè nànsha cìmwè cyà ku Cyòci aci to.” Nwamònu's, bòbò kabèèna bàDìjingulula to.

¹⁵¹ Netùye mu masangisha, Nyumà Mwímpè munene awu neàpwekè. Mvwa musòmbe mwaba awu ditùkù adi,

pààkabwayikà cikèènà-kumòna ne cidyànjila kwamba ànu bwalu menemene. Mémè kwamba ne: “Ki nsongààlùmè ulwàlwa ewu.” “Lwâkù apa,” mvwa mufunkùne lwà ku luseke lùvwa mwakididi wa bantu awu ne: “udi ne dîsaamà dyà mwoyi ne udi ukèba. . .”

“Èyowà. Ncyà bushùwà menemene.”

152 “Nudi numòna mukàjì ùlwàlwa mwaba awu anyi?” “Lwâku apa. Udi ne cyûjà cyà kànsêrè ku dibèèlè, ne cidi ku dibèèlè dyà dyàbakàjì, ne wèwè mwinè udi mu ngiikàdìlù mubi be. Ne udi ngènzàmpèkààtù kàdi kùyi. . .”

“Cyà bushùwà menemene.”

153 Bantu bàdì basòmbe mwaba awu abu, kukènzakanabo, bayiishi ne bònsò abu, kwambabò ne: “uh-huh!” Kuya mu disangisha, kutàngila Nyumà Mwîmpè ùpàtuka mu disangisha ne wamba maalu masokòme à mu myoyi, bintu byà mùshindù awu. Wamba ne: “Bilenga be. Ngèèla meeji. Èyowà.” Nwamònu anyi? Kaa, mwanèètù! Nwamònu anyi? Cidi—cidi—cidi ku luseke lukwàbò, kùdi cintu kampànda cyenzèke. Bakàjì nebàtùngunuke ànu kutùngunuka, bènza cintu cìmwècìmwè aci. Balùme nebààlukilè buludì, bu mùdi ngulube ku bitoci byèndè, ne mbwa ku bilùshì byèndè, ànu byà mwòmùmwè. Kanwènaayiku numòna anyi? Mpindyewu ndi ngàakula ne ka-. . . kùdi. . .

154 Nwamònu’s, udi ne cyà kumanya díbà adi, mulundà wanyì, ne ngiikàdìlù kaayi ùdi usanganyiibwamù awu. Ki bwà cinyì mukàbà wà méyi ewu, mvwa mwambe ne: “Udi ànu bwà èkèleeziyà nkààyèndè.” Nwamònu anyi? “Bwà èkèleeziyà nkààyèndè.” Pawikalà mubiikidìibwè bwà kuumuka ku bukènkè. . . kuumuka ku mîdimà kuya ku Bukènkè, kuumuka ku lufù kuya ku Mwoyi; kuumuka ku mmwènenù wa kwìsùkwìsù, ne wa meeji à mu mutù wa Kilistò, kuya ku dilabula dyà dilediibwa dyà cyàkàbidì; ne utàngila lwendu lwèbè, umòna ne lùdi lùtèeka bintu byà pa buloba ku luseke, ne utwà ku cyà Kilistò, kùyi utanga cintu to; díbà adi cintu kampànda ncyenzèke. Nwamònu anyi? Kùdi cintu kampànda munda mwèbè, ciikàle ne nzala ne cikwàta mudimu, mùvwaci mu Yakòbò amu. Wamònu’s, udi ulwangana mvità ne Mukalenge, udi wenda bishìllàngàne paanyimà pàà aci. Cintu kampànda ncishìllàngàne munda mwèbè, udi mushintùlùke.

155 Mpindyewu, bìdi ne cyà kwikala nànkù, kumpàla kwà byòbì kwenzeka, bìdi ne cyà kusonsodiibwa kùdi. Nànsha bishi, mvwa mwà kwimana mwab’ewu ne kuyiisha too ne mungà. . . ne mwàtùùka nsukì miine yîndì mushààle naayi eyi, too ne mwàkòbamà makaaya ànyì ne mungàpeta bidimu makumi citèemà, kàbidì pèebe utèèlèja ditùkù dyònsò; Nzambì kàyi mukufuùlùlwilaci to, newikale ànu mu lwidì lùmwèlùmwè elu.

156 Matùkù àbìdì majimà àndì munkacì mwà kulonga ne kusambila pa bwalu ebu. Nwamònu anyi? Mémè kwamba ne: “Mukalenge, ncyàmbila èkèleeziyà anyi?”

157 Cintu kampànda kwambaci ne: “Cyambè. Dìbà dikaadi pabwipi. Cyambè.” Ndi ngùmvwa ne Neànguumushe matukù makesè aa, pa nàнку ndi—ndi muswè bwà nwènù kucimanya.

158 “Muntu nànsha umwe kèna mwà kulwa kùNdi to,” mwàkambà Yesù, “pàdì Taatù Wanyì kàyì mumukòke dyàmbedi to. Kaa, ndi mumanyè ne nudi nwamba ne nudi ne Nzambì ne Abraham, bu tatwènu; kàdi ndi nnwàmbila eci, nudi bà. . . tatwènù dyabùlù,” mmwàkambà Yesù. Batèndeledi, baakwidi, ne bantu banène ne: “Nwènù nudi bàà dyabùlù, tatwènù.” Nwamònu anyi? Mònaayi, mamuma à Nyumà.

159 Mpindyewu, nwamònu’s, bikèngela cifuululudiibwe kùdi.

160 Ncivwa mwà kudifwànyikijila Noà wàmba ne: “Nudi bamanyè mùdì bwalu anyi? Bìdì ànu ne cyà kwikala ne mvùla mmufwànyine kulòka dīngà ditùkù, pa nàнку ndi ànu mwà kupàtuka ne kudiibakila bwàtù. Mvùla yèyè mulòke, èè, nembwelè mu bwàtù ne kukwàta njila kuya. Ne kakwàkwikala cintu cyàntàcishà to, bwalu nembwelè mu bwàtù ne kwasa lwendu kuya.” Nudikù mwà kudifwànyikijila anyi? To. To. Aci kacivwa cyòci to. Bu ne civwa nàнку. . . Kaa, Basungula bàcìtèèlejeku mpindyewu. Bu cyòci cifwànyine kwikala nàнку, musekyanganyi wa kumpàla wàkopicila mwaba awu, mùdì Bible mwàmbe ne bàvwakù amu, kàdi kumusekayè, nùнку’s ùvwa mwà kwikala mutèèke nsandu wendè panshì mukwàte njila muyè.

161 Mùdì bantu bènza leelù ewu, bàdì bàbanga ne Yesù; kàdi pàdìbò bàtàngila ne bàmòna Bulelèlà, bàdì baBwèlà nyimà bàya. Kabèèna mwà kuBùtwàla to.

162 Bu mùvwà mutangidiki wa lumù awu mwàmbe ne: “Neci—necisùnsululè mudimu wànyì wà bwambi.” Ncyèna dijinga ne mudimu wà bwambi ùdì Nyumà Mwìmpè usùnsulula awu to. Udi ne cyà kusùnsuludiibwa. Mpindyewu, kàdi mònaayi, ndiditambisha, bitàmba kushindameena pa muntu, buntu bupite. Kaa, tàngilàayi mu cyòci emu mpindyewu.

163 Noà ùvwa mupàtùke mu mpàta, ne wàkatèèleja, ne wàkajingulula, è kwenzayè mudimu. Nànsha mwàkalwàbo kùdì basekyanganyi bààbùngì amu, wàkatùngunuka ànu ne kwibaka.

“Noà, wèwè udi munsantu mubùnguluki wa mu malaba.”

164 “Kabyèna bintàcisha nànsha kakesè to.” Mutùngùnuke ne kwibaka! Ùkaavwa muumvwè. Ùvwa mujingùlùle ne n’Nzambì, wàkadilumbulwìshila ku Mifùndu, ne civwa nàнку. Wàkadìbwinka dyàkàmwè mu diibaka dyà bwàtù, kàyì ùtanga bwalu to.

165 Nudikù mwà kudifwànyikijila, nudikù mwà kudifwànyikijila eci anyi, cyà ne Mòsà, mu njila mutàngile mu Èjiipitù, kupàtùkayè dinga ditùkù e kwambilayè Sefòlà, mukàjèndè ne: “Sefòlà, udi mumanyè mùdì bwalu anyi? Ndi mupilùje mwakulu wanyi ndambù. Ndi mwolòlòle ndambù wa makumi ànyì wònsò, ne ndambù wa géométrie wanyi ne, kaa, bintu bikwàbò byàbùngì, ne dilonga dyànyì dyà kàlaasà. Kacya ngàbanga kulama mìkòòkò paanyimà apa, ndi—ndi—ndi mupilùke mu bimwè byà ku byòbì abi. Mwva mwenze cilèma mu Èjiipitù. Ndi ngèèla meeji ne nêmpwekèmu nkacìlongòlòlè. Ndi ngèèla meeji ne nêmpwekèmu”? To, divwala dyà kumpàla dyàkamulwilà, nùnkù’s ùvwa mufwànyine kufwila mwaba awu.

166 Cyàkenzàye ncinyì? Wàkapwà mwoyi byònsò bìvwàye mumanyè pa géométrie abi ne pa dimanya dyèndè dyà mu mutù adi. Dyòdì adi ndyàkamubwejà mu lutàtu.

167 Kì cìdì cibweje èkèleeziyà mu lutàtu leelù ewu ncyòci aci, mbayiishi bààbùngì bàdì balonge tulaasà kabàyi balediibwe kùdì Nyumà to. Balùme ne bakàjì mbaswè kutèeleja miyiiki yà meeji à mu mutù, pamutù pàà kuyiisha bukolè ne dibìikà dyà ku lufù dyà Yesù Kilistò. Kì cìdì cìtùbweje mu lutàtu leelù ewu ncyòci aci. Katwèna tukèngela bikwàbò bilongelu bitùmbùke ne dilonga dyà tulaasa bwà bayiishi to. Bidi bitùkèngela bantu bàà Nzambì bàdì bùjiibwe tètè ne Nyumà Mwimpè, kàdì kabiyi tèòlòjì kampàndà wa dingumba kampànda mukwatakaja kùdì bantu to. Tudi tukèngela balùme babiikila kùdì Nzambì.

168 Mòsà ùvwa ùdiisha mìkòòkò, musòmbe mupwè ne mwoyi. Ùvwa mumanyè ne mamanya èndè à mu mutù àvwa mapangile. Ùvwa mumanyè ne dilonga dyèndè dyà tulaasà dyàkamupangisha. Ùvwa munkaci mwà kudiisha mìkòòkò, kàdì wàkuumvwa, kaa ne: “Kòpolà bisàbaatà byèbè, Mòsà, buloba bùdì mwimànepu mbwà cijila.” Wàkatèeleja cyòci aci. Cìvwa ncinyì aci? Dìyì divwà Mwanjèlo mwàmbè adi divwa dyà mu Mifundu. Ùvwa mulaye Abraham, tatwèndè ne: “Nènkùmbulè cisàmbà paanyimà pàà bamanè kupweka munwemu bènze bidimu nkàmà yinaayi, ne Nèmbàpàtùlè ne dibòkò dyà bukolè.” Wàkajingulula ne aci cìvwa m’Mufundu wà Nzambì munkaci mwà kumwèneshiibwa.

169 Lekèlaayi ngànji kwimana katùpà. Lekèlaayi eci cibwelè mu ndòndò. Nudikù bamòne cìndì munkaci mwà kwakula leelù ewu anyi? Dìyì dyà Nzambì didì munkaci mwà kumwèneshiibwa ànu kumpàla kwènù mene, kàdì nwènù kanùyì nudìjingulula to. Anjì elààyibì meeji mpindyewu ku Sodomà ne Gomòlà; anjì elààyibì meeji ku mulayi wa Kilistò bwà matùkù à ndekeelu aa.

170 Mòsà wàkacìjingulula; cìvwa cyà mu Mifundu, cìvwa mmulayi. Wàkuumvwa, wàkajingulula. Cintu kampànda kubwelaci munda mwèndè, mwanèètù, dìbà adi ùvwa mwà kuya kacyènza. Wàkenza. Ùvwa mwà kuya kakwàta Pàlò yònsò.

Ūvwa mwà kubiikila bipùpù díbà òwàye muswè. Ūvwa mwà kukàngula Mbù Mukùnze, bwalu ùkaavwa muumvwè, ùvwa mujingùlùle, ùvwa wènza maalu pa kaaba kàà Nzambi.

“Mémè nengikale Nzambi kùdì, wèwè wikalè mupròfetà kùNdi,” mwàkambàYe.

Ki yèyè ne: “Ncyèna mwà kucyènza to.”

¹⁷¹ Yèyè ne: “Èè, díbà adi, wèwè udi nzambi, ne Aalònà ikalè mupròfetà webè. Udi ne cyà kuya, nànsha bìshi.”

¹⁷² Kacya Yèyè kàtukù ànu mwambè ne: “Èè, pàmwàpa bìvwa bikèngela bwà mémè kupweka bwà kulongolola bintu abi to.”

¹⁷³ Nudikù mwà kudifwànyikijila Eliyà pa Mukùnà wa Kaamèlè, wàmba ne: “Nudi bamanyè’s, buloba ebu mbwà mpèkaatù wa wènza bwòwà, pàmwàpa, pàmwàpa mvwa mwà kupàtuka ne kukambila Aakàbà ne ùvwa ne cyà kudyùmvwà bundù. Pàmwàpa mvwa ne cyà kuya ku mukùnà kwàka ne kusòmbakù, ne kujila byàkudyà mukùngùlù mule, mu mùshindù wà ne bantu abu buumvwè bibàtonda ne bàcyòka ne dimmònà kuulu aku munkaci mwà kufwà ne nzala”? To. To. Aci kacìvwa nànkù to.

¹⁷⁴ Kàdì wàkuumvwà, ne wàkajingulula, ne wàkenza. “Ndi mutùmìne bikòlolò díyì bwà kukudiisha. Bànda kuulu kwàka, lwà ku Kelità.”

¹⁷⁵ Pààkakùmbanà díbà dyà ditetangana dyà makàndà pankaci pàà Bâlà ne Nzambi, kwambayè ne: “Ndaayi, kangàtaayi mìlàmbù yènù, nwenzè naayi cintu kanà cvònsò cinùdì baswè kwenza, kàdì nùsokè kaanzambi kèènù aku.” Pààkaditàpàbo mpùtà, ne benze maalu àbùngì à musunya, ne kutùpikabo bàdyèla muulu bààlukila panshi, bènza mutooyi wàbùngì, kwambayè ne: “Elàayi mbilà mikolè ndambù, pàmwàpa mmuyè, ùdì munkaci mwà kwenza cintu mwaba kampànda. Mmufwànyine kwikala mulàalè.” Kaa, mwanèètù!

¹⁷⁶ “Èè, udi mumanye mudi bwalu anyi?” Yèyè ne: “Mémè ndi mwena kwitabuuya mu Yèhowàh, nànkù ndi mwà kwenza cikampànda eci, nànsha bìshi.” Kaa, to, kùtèntudikù aci to. To. Kùteeci kwikala Eliyà pàdì Nzambi kàyì mukubiikile bwà kwikala Eliyà to. Èyowà, mukalenge. “Ndi musadidi wa Yèhowàh.” Bàdikù nkàmà mwandamutèkète kuntu kwàka, kàbidì, kàdì nànsha umwe wa kùdìbo kààkadìdinga bwà kucyènza to.

¹⁷⁷ Pashìishe pààkasaayàye ngombe wa mpànga ne kupòngòlwelapù màyì, wàkamba ne: “Mukalenge, ndi mwenze cintu eci ku díyì Dyèbè ditùma.” Nwamònu cìdì. . . Muntu kanà yònsò ewu ùvwa mwà kwikala mutèètè, ùvwa mwà kumutuula ànu mutupù mwà menemene emu.

¹⁷⁸ Ànu cyòcì cikusonsolwela! Nyumà Mwìmpè ùdì ne cyà kucitwàla ne kucimwènèsha patòòke kùdì.

179 Ki lutàtù lùdiku leelù ewu ndwólò alu. Kwèna mwà kujuuka, ku cyoshelu, kwamba ne: “Èè, Àlèluuyàh, Àlèluuyàh. Mukalenge, ndi muswè Nyumà Mwîmpè. Àlèluuyàh, Àlèluuyàh.” To.

180 Kàdi, mwanèètù wa balùme, mwanèètù wa bakàjì, pàdi Nyumà Mwîmpè musonsòlè Dìyì adi kùdì, neùMupeté kumpàla kwà wèwè kuumuka mu nkwasà webè amu. Cintu kampànda ncilakùke munda mwèbè amu. Muiishi kààkwikala ne cyà kukwambila ne enza *cikampànda* enza *cikansanga* to. Mabèjì à kale neàditùùkile, ne mabèjì mapyamàpyà neàtolokèku. Mbakusonsòlwèlaci. Wèwè kwàkufikila muiishi munda pàdiye ùyiisha Bulelèlà bwà mu Bible to. NeùBunangè, neùBùkèbè. Bùdi Cyàkudyà cyà musùukà wèbè.

181 Nànsha Yesù, Yèyè mwinè, Wàkamba ne: “Ncyèna ngèza cìNdì muswè kwenza, mu Mémè mwinè to. Mwànà kèna mwà kwenza cintu nànsha cimwè to ànu cìdìYe umòna Taatù wènza aci.” Mèyì. . . Yèyè ùvwa Èmanùwèlè, Yèyè mwinè. Ùvwa Nzambì pa buloba; ke cìvwà Yesù. Ùvwa mubidi ùvwa Nzambì musòmbèlemù. Yèyè nguvwa nntentà uvwa Nzambì musòmbèlemù. Amen. Kàdi mu byònsò abi, Mwànà wa Nzambì mulela kùdì virgò, Èmanùwèlè mu kaabujimà kàà Nyumà, Ùvwa ne Nyumà kàyì ne cipiminu to. Kàdi, nànsha nànkù, mu mubidi Wèndè Yèyè mwinè, Yèyè wàkamba ne: “Ncyèna ngèza cintu nànsha cimwè to ànu pàdi Taatù Ùndeeja dyàmbedi.” Cimusonsolwela kudiYe, bwà kucyènza!

182 Sàtaanà kwambayè ne: “Andamùnà mabwè aa àlwe mampà, ne enza cishimà. Cyenzaaku tũng.”

183 Yèyè kwamba ne: “Bààkafùnda ne: ‘Muntu kààkwikala ne mwoyi ku dyàmpà nkààyaadi to.’” Kaa, ekèlekèlè! Kàdi pàvwà musùmbà wà bantu ne nzala, Wàkambula mampà àtaanu ne tuumishipa túbìdi tukesè, e kudisha bantu binunu bitaanu. Kaa, Àlèluuyàh! Nudi numòna cìdì njinga kwamba aci anyi?

184 Kùteeci bwà kutentula to. Ki lutàtù lùdì naalù Mpenta leelù ewu alu. Ki lutàtù lùdì naalù ekèleeziyà leelù ewu alu’s, kùdì bààbùngì menemene bàdì bâteeta kudingidija mùdìbo ne Nyumà Mwîmpè. Kùdì bààbùngì bàdì bâteeta kutentula dyondopa dyà kùdì Nzambì. Kùdì bààbùngì bàdì bâteeta kutentula bintu bishiiilèshiiilàngàne byà Mukalenge. Kwena mwà kwenza nànkù to. Bintu abi bidi bifumina ku disungula, dibiiikila dyà Nzambì, udi mupàtùke naabì munda mwà mamwèbè. “Mapà ne mabiikila kî mbyà dinyingaleela to.” Kaa, ekèlekèlè! Aci’s ncilelèlà. Kwèna mwà kudivwija cintu kampànda cyùdì kùyì to.

185 Kàdi Nzambì Yèyè mukubiikile, ikalà muntu wa kusàkidila kwàbùngì pa buloba bwalu Yèyè mmukubiikile. Dìbà adi cidi cìlwa cilelèlà menemene kùdì.

186 Mùndì mufwànyine kwamba, bu ngìkalapù ne dìbà, pa bwalu bwà nshìndì ditùkù dikwàbò, bwà mwà kanshintululàci.

Kacya kwònsò eku ncívwa mwanji kucimònaku nànsha, ne ncívwa mwà kucyènza to. Hattie, udi musòmbe lwà mu ndekeelu mwàmwa muntàngile. Mmunyi mùvwà cyôci mwà kwenzeka? Kacívwa mwà kwikala cicyènza to, kàdi cívwa cisonsòdiibwè, civwijübwe ne mwoyi. Diyì òvwwa dyakùdiibwe ne byàkenzeka ànu nànkù. Àlèluuyàh!

¹⁸⁷ Pòlò, nudikù bafwànyine kudifwànyikijila yèyè wàmba ne: “Mvwa mwenze matùkù dikumi ne ànaayi à munya ne à bufùku pa mbù ewu, byà bwalu abi kakùyì ní mmìtòòtò ní ngondo, anyi dîbà nànsha cintu cimwè. Mvwa ngèèla meeji ne nènye ànu nkàbambile ne: ‘Kolèshaayi mwoyi, bwalu Nzambi neàtúcýuke, nànsha byà munyi?’” Kaa, Nzambi kàtu ùkwàta mudimu mùshindù awu to. Nzambi kàtu wènza nànkù to.

¹⁸⁸ Diitabuujà dyèbè didi bìmpè, mwanètù. Diitabuujà dyèbè ndilenga be. Kàdi ànu cintu aci cisonsòdiibwè kùdi!

¹⁸⁹ Kaa, ki bukènkè bukúnze bùdi bulembèlèle bwàbwa, kàdi mémè mumòne. . . Ndi ngàmba ne: “Èè, ndi ne dikàsà dyànyì pa dikàsà dyà biteshi byà màshinyì. Ndi ne kàshinyì. Ndi mwà kusambuka bukènkè bwàbwa, muvùkùte lubilu lwà kilòmèetà lukàmà ne makumi citèemà ne yìbidì ku dîbà.” Ncyà bushùwà. “Ndi mwà kuumvwa bukolè mwìnshì mwà dikàsà dyànyì.” Kàdi mbìmpè kwindila too ne pàälwà cimanyinu cyà ne: “ndàku” aci. Àlèluuyàh!

¹⁹⁰ Nudi búmvwè cìndì njinga kwamba aci anyi? [Disangisha didi dyàmba ne: “Amen.”—Muf.] Pàdi cimanyinu cyà *kuya* cipàtuka, mbìmpè. Pàdi cintu cikusonssolwela, ne Nzambi ùcimanyisha bu mwàkenzàYe kale wàwa, mbìmpè. Kàdi pàdiYe kàyì mwanji kucyènza to, tudi ne musùmbà wà ba Yudààsà munkaci mwà kutentula, ùtùnguka ne kwenda mùshindù awu, wàmba ne: “Èè, ndi ànu wa mwomùmwe naabò. Ndi pàanyi, mwena Kilistò.”

¹⁹¹ Kaa, kanwèna bavùlùke anyi? Bânà bàà Scevà, bàakaya e kwambabo ne: “Tudi tukutumina diyì, tukutumina diyì mu Dîna dyà Yesù udi Pòlò uyiisha awu. Pàtukà!”

Yèyè kwamba ne: “Pòlò ndi mumumanyè, ne Yesù ndi mumumanyè, kàdi nwènù nudi banganyì?”

¹⁹² Dîbà dilwalwa diikalà cilelèlè ne cyà mafi ne cyà kumwènèshiibwa patòòke. Cìdi cimwènèkela mu beena Kilistò leelù ewu. Bìdi bìleejikila mu maèkèleeziyà leelù ewu. Bìdi bìleejikila mu bantu leelù ewu. Ndi munulamè ntàntà mule; ndi muswè bwà eci kunùfikaci.

¹⁹³ Pòlò kàakambakù ne: “Ngèèla meeji ne nèmbandè ànu cyanànà ne kubàmbila ne: ‘Èè, ikàlaayi ne dikima dyònsò.’” To.

¹⁹⁴ Cyàkenzàye ncinyi? Kutèelejaye Mwanjèlò. Ûvwa mumanye ne ùvwa m’Mwanjèlò umweumwe uvwa misangu yònsò ànu wàkula nendè awu. Wàkajingula, pasiishe wàkenza bwalu.

Wàkiimana kuulu e kwambayè ne: “Ikàlaayi ne dikima. Bwalu Mwanjèlò wa Mukalenge, Ûndi musadidi wendè, ùvwa mwimàne ku luseke lwànyì dilòòlò dishààle edi, ùndeeja cikèènà-kumòna kampànda cyà ne kakwàkwikala cintu nànsha cimwè cyàjìmina, mu bwàtù emu to. Ikàlaayi ne dikima. Kadyàyi cyàkudyà cyènù cyà mu munyà emu mpindyewu. Byònsò bìdi ànu bimpè.” Amen. Pàdici cikusonsolwela, mpàdi Nzambi ùcìvwija cyà bushùwà!

¹⁹⁵ Ndi ne dīyi kaaba aka mwaba kampànda, mvwa mufunde. Ndyòdi edi mwaba ewu. Uh-huh. Tudi ku ndekeelu kwà bintu byònsò. Swàyi naitwàlè ànu mùshindù ewu mpindyewu, bwà kwoya. Ndi ntèkemena ne Nzambi mmukubuulwile cintu kampànda. Tàngilàayi. Byònsò bìdi ku ndekeelu. Muntu kampànda wàkakonka dilòòlò adi, ngèèla meeji ne ùvwa m’Mwanèètù Fred Sothmann, tuvwa tudikonka bwà mùshindù ùdi cikondo cyà nshìikidilu cisemène.

¹⁹⁶ Mwanèètù Demos Shakarian ùvwa mumòne cikèènà-kumòna aci cimwènèshìibwe, ne cyàkakùmbana paanyimà pàà matùkù àtaanu, pyòpyopyò, cìvwa cyàmbe kumukùlula. E kumbiikilayè. Yèyè kwamba ne: “Yòzefù ùdi bishi?”

Mèmè ne: “Bimpè.”

Yèyè ne: “Ûtu ùmòna bikèènà-kumòna anyi?”

¹⁹⁷ Mèmè kwamba ne: “Èyowà. Ûvwa mungambila bwà David, mwànà wa balùme wa Mwanèètù Wood, mùvwàye mudishindile pa ntukutuku, matùkù àsàtù anyi ànaayi kumpàla kwà kwenzekaci, ànu pyòpyopyò menemene.”

Yèyè ne: “Udi mumanyè’s, bintu abi bitu bilonda mèkù.”

¹⁹⁸ Mèmè kwamba ne: “Bwakàne anyi bubì, èyo, ní ng’eci ní n’cikwàbo. Bitu bilonda mèkù.”

¹⁹⁹ Nènku tuvwa tuyiikila kakesè ndambù, ne bòbò, Fred kungambilayè ne: “Cyòci eci ncisunyina penyì, Mwanèètù Branham?”

²⁰⁰ Mèmè ne: “Tàngilà, Fred, tùcyàngàcìlè ku bufùki. Nzambi ùtu ùkwàta mudimu mu bufùkì Bwendè. Tàngilàayi, nùmone cyàkenzekà. Dìbà dyàkapàtuka ku Esètè. Ki dishidimuka dyà kale menemene ditùdi naadi, n’Chine.” Bònsò bwètù tudi bamanyè cyòci aci.

²⁰¹ Dishidimuka dyà kale menemene ditùdi naadi n’Chine. Mmwòmò. Ne dishidimuka nditentèmùke misangu yònsò ditàngile ku Wesètè. Kàdi mpindyewu nkwèpì kùdì mwà kudisangana bu wèwè mwà kuumuka mutàngile ku Luseke lwà Wesètè, uya buludì bwà kusabuka? Uyààya ku Chine. Menemene. Tukàadi ku ndekeelu. Bible mmwambè, mupròfetà mmwambè ne: “Nekwikale ditùkù dìikalà kadiyi bufùkù anyi muunya, pààpicila dìbà pamutù apu, kàdi ku ìbaamulòòlò,” ànu menemene kumpàla kwà kujikilaku mwab’ewu, “nekwikale Bukènke kàbidi, bùmwebùmwe abu.” Yesù wàkamba ne:

“Nekwikale mvùlà yàmbedi ne mvùlà mishìishe. Ne mvùlà mishìishè neyilelè mvùlà yàmbedi ne mvùlà mishishè, mu muvù ùmwèùmwè awu.” Tudi ku cikondo cyà nshìikidilu.

²⁰² Tàngilàayi kùneeku, lekèlaayi nnùleejè. Cidìidì cidi ku ndekeelu. Nudi nwitabuuja nànkù anyi? Ndeajaayi cintu kampànda leelù ewu. . .

Ditùngà edi ki didì ditàmbe bubì ku wònsò pa buloba, bwà cinyangu, dipeetù dyà maalu à Nzambi. Nganyi uvwakù mubalè mu Cibèjibeji dilòòlò kampànda, mu Louisville, pàvwà bakàjì bònsò aba, bàvwà basungùdiibwe, mu ditùngà dyònsò, bakàjì balenga batàmbe bakwàbò mu ditùngà, kàdi kubìimanyika bwà kwikalabò ba Miss bàà buloba bujimà anyi? Bantu bònsò bààkayaku pa kuumusha Russie. Ki kutùminabò Khrushchev mukenji bàmukonka ne: “Bwà cinyi kwena mutume?” Yèyè ne: “Russie kàtu ùvùla bakàjì bèndè bilàmbà, bwà kwendabò kumpàla kwà balùme to.” Ditùngà dyà bampàngaanù, dipetudi dyà maalu à Nzambi ditùdyula twètù bàdì bàdibìikila ne beena Kilistò, wàmba ne: “Russie kàtu ùvùla bakàjì bèndè bilàmbà, bwà kupàtukabo bènda mùshindù awu to. Ne kanwenàku numòna tùpùtulù anyi bintu byà mùshindù awu mu Russie to.” Aci ndipeetula dyà Nzambi. Ne twètù biinè bàdì bàdibìikila ne “beena Kilistò!”

²⁰³ Kabyèna bìkèmesha to mùdì Bible mwambè ne: “Mèèsà wònsò mmalwè mùle tètè ne bilùshì. Kàdi nganyi uNgààlongeshà Dilongesha, kàdi ng’ewu udibò batùule ku dibèele anyi? Kàdi kanungu nekantentamè pa kanungu, ne mulongo pa mulongo. Bwalu ku mishikù yìdì yìkukumina ne myakulu mikwàbò ke kuNgààkwilà ne cisàmbà eci. Nènku’s ke Diikisha edi. Bwalu byònsò ebi, kì mbafwànyine kuumvwa to.” Tudi ne mmwenenu wetù wa mamanya à mu mitù. Kaa, s’bivwa kwikale bilenga be bwà kushàalaku ditùkù dijimà pa Cyòci eci.

²⁰⁴ Cidìidì, ncibole! Ba-démocrates, ba-Républicains, ne bònsò abo, mbàà ciipanshì. Ncinyi aci? Mmushiki wà matàmbà masomeka. Muntu yònsò udi ukwàtamù mudimu, udi kàyi mulediibwe cyàkàbìdì to, ngwa dyabùlù. Dyabùlù wàkamba ne: “Bukalenge bònsò pa buloba ebu mbwànyì mèmè,” kàdi Yesù kààkakòkangana nendè nànsha. Buloba mbukòntonona kùdì dyabùlù. Ne muntu yònsò udi wenza mudimu bwà bukalenge awu, yèyè kàyi mwena Kilistò to, yèyè ngwa dyabùlù ne ukwàta mudimu bwà dyabùlù. Matùngà aa neàshaalè ònsò à Yesù Kilistò pààlwàYe, nekwìkalè Bukalenge bwà bidimu cinunu.

²⁰⁵ Tàngilàayi kunweku leelù, cidìbò bàlonda mpindyewu. Bàngeela mbilà bàndyula bwà ditùula dyà mfranga kuntu kwaka bwà kwambulwisha beena Kilistò, ne bajinga bwà kunkòsela bidimu makumi àbìdì mu bùlokò, bwalu ndi mutùule mfranga bwà maalu à ntèndeleele. Kàdi wiski ne maalà à byèrè ne mfwankà bìdì bicyunguluja mfranga miliyò makumi yà ndola ku

cidimu, bwà kukooyisha ditùngà. Kàdi pàànyì nteeta kuyiisha bwakàne, mwimàne mu ciibi cyà Yesù Kilistò, kàdi bàntùma mu nzùbu wa bùlokò bwà cyôci eci. Kàdi kwangata cintu cyà bwena aci cyà bubì, cyà ciipanshi, cyà meeji matwè, cyà lungenyi, kàdi bàlekela cipita mu ndongamu yà ku téléviziyò yìdi mikooyishe buloba, mitùme bakàji kùdi mbwa ayi. Ùmwè wà ku milawu minène yitù kacya ditùngà edi dipetè, kadi bàdi bàbàlekela bàbyenza. Bàdi bàntùma mémè mu bùlokò bwalu ndi muyiishe Èvànjeeliyò, ngàngata ndola mikesè mwab'ewu bwà—bwà kuyiisha Èvànjeeliyò, yìdi bantu bàmpèesha bwà kuyiisha naayi Èvànjeeliyò ayi. Ncyèna mubanji to kàdi ncyèna mwà kubenga kuyifucila bitàdi to. Kàdi nànsha nàнку mbaswè kungeela mu nzùbu wa bùlokò, kundamamù bidimu bibidi, ne bàdi ne cyà kundambulwisha àbìdi àdi panshì aa. Kaa, aci's ncyà ciipanshì be, ncyà manyaanù be! Nzambì, ikàlèku ne luse's wè.

²⁰⁶ Nèngambèku cintu cimwèpelè eci, pàmwäpa ke mùshindù ùdi naawù Nzambì kumpàla kwà kutùmaYè bombe bwà mushindà. Udi ne cyà kwenza cintu kampànda cyà cibì, udi mumanyè's. Udi ne cyà kulenga beela maanyi Bèndè musangu kampànda, bwà Mufùndu ùmwèumwè ewu, kabiyi nàнку to. . . “Kanùlengi Basungula Bàànyì to.” Ncyà bushùwà. Pa nàнку pìikalàbi bikèngela aci bwà kutwàla cilumbulwidi, bu mwàkatwàlaci mu matùkù à Danyèlè anyi mwaba kampànda mukwàbò, cìlekèlaayi cìlwe. Mémè ndi musadidi Webè, Mukalenge. Ncyà bushùwà. Kaa, èyowà.

²⁰⁷ Cidiidi, ncyà ciipanshì! Ditùngà, dibolè! Èè, ditàngilaayi! Nebàvwàdikè bàsàlaayi tùpùutulu mpindyewu. Kaa, ekelekèlè! Cidiidi, mvità's! Cidiidi cidi ku ndekeelu. Bamfumù bàà cimbàmbilà mbabi. Cidiidi ncibi. Bwà cinyi kabàākashàala ne mfùmù wa difwàna dyà Nzambì bu mùvwà Nzambì mubàpèesheyi amu, Davidi? Mfùmù munène wa mu Anglettere wàkamba, pàvwà ewu—pàvwà mungàlààtà ewu mwenjìibwe, wàkamba ne: “Mbìmpè mpindyewu, kàdi nekùlwe cikondo,” mwàkambàye, “neciikale cintu cyanààna. Nebiikalè bashàale ne cipàkù bwanga buyè.” Nènku yèyè mmubingè. Wamba ne: “Beena cidiidi mbiimàne pa tushèete twà nsàbanga mu ditumba dyònsò, bintu byà mishindù mibi byònsò bìdi binyanga bukalenge.” Nàнку muntu awu ùvwa mubingè. Ncyôci menemene cidi munkaci mwà kutùngunuka.

²⁰⁸ Muntu umwe ùdi mwà kupàtuka pambèlù apa, ne kupicila apa bwà kukwàcika maala, ne kusùsulula cintu cyònsò cidiye mwà kusùsulula aci; ne kupweka kwinshì kwàka, mmumanyè muntu yònsò, mu mùshindù wà ne kakùyiku muntu kampànda wa ufytola mukana to. Kàdi lekèla ànu muntu mupèlè kampànda, anyi muntu kasanga udi kàayi mumanyè to, àteetèbi ànu kucyèenza, kàdi's bàdi bàmwela mu nzùbu wa bùlokò. Diyanguka, ciipanshì, bukooyà, byà pa lukàmà byàbò makumi ànaayi mbalùme bàdi bàsèlangana ne balùme naabò.

Elààyìbì meeji pa bwalu abu's, Sodoma ne Gomolà cyàkàbìdì! Ke musumbà ngwáwù's, úvwà ne cyà kwikala wà batèndeledi awu.

209 Ndi—ndi ndikonka cyènzeka kumpàla eku, pàbwelà mfùmù wàlonda awu mu nkwasá? Nzambi mmutùpèèshè muntu mwímpè wa difwàna dyà Nzambi, mununu Dwight Eisenhower. Kàdi mpindyewu nd nèm-...Tàngilàayi cintu cyàlondà pashìishe. Kàdi tudi bafwànyine kupeta nkose musangu ùdì ùlonda, ncyà bushùwà menemene. Kàdi kùdì kùlwa: “Pàlò udi kàyì mumanyè Yòzefù nànsha.” Vùlukàayi cintu aci. Nemfike ku cyòci aci mu katançi kakesè menemene emu. Cìdiidì ncibolè. Tudi bamànyè aci.

210 Mvità yìkaadi ku ndekeelu kwàyì. Kaa, bàvwa bàasangana mabwe cikondo kampànda muntu ne mukwèndè, bàtàpangana bisuuyi byenza ne mabwe mu mitù, pashìishe bàsangana miketa ne mafùmà. Pashìishe kupetabò bingoma byà pùùpùpùpù, pashìishe bingoma byà mwambùyi, pashìishe bingoma binène byà cyena Allemagne, ne bingoma binène menemene byètù twètù. Pashìishe kukùpabò tubùlubulu twà mushinda ne mulùngù wà gaze. Kàdi patùdì twakula apa bàkaadi ne bombe bwà hydrogenè. Mvità yìkaadi ku ndekeelu. Ditùngà ne ditùngà didi naabi, ngambilaayaku tùng cinwènzà mpindyewu? Nànsha ditùngà dikesè leelù ewu, didi ànu mwà kutwà munu pa ndèndè, ki cyònsò cìdibo mwà kwenza, ne buloba bwònsò pààbù bumba bùtùdika. Mvità yìdì ku ndekeelu. Huh! Amen. Mvità yìdì ku ndekeelu. Cìdiidì cìdì ku ndekeelu.

211 Dilonga dyà tùlaasà dìdì ku ndekeelu. Dinyanguka dyà bânà dìdì ku ndekeelu. Bânà, kakwèna cyà ditèkemena bwà bânà to, mbamanè kutomboka. Kanwèna mwà kwikala ne dilonga dyà kàlaasà nànsha dimwè to. Kanwèna mwà kuya kuntweku mu cilongelu kàdi kupeta, kupeta mwàna ne nkolèshelu mwímpè to. Udi—ùdì mwàna wa mu ifernò misangu yìbìdì kutàmba pàkaadiyè ùpàtuka apu kupita pàvwàye mubwelèmu apu. Mulongeshi àdìdingè ambe ànu cintu kampànda pa bwalu abu, bàdi bàmushebeya. Nèbènzè Cìkùlùkùkù cikesè bàya bàkaasa mulongeshi awu, bàmpàtula pambèlù bàkamowa ku myonji. Tudi bajimije balongeshi binunu bìbìdì. Kaa, anjì indilaayi kakesè, ngèèla meeji ne bàvwa balongeshi binunu makùmi àbìdì, cidimu cyàshàadi eci. Ncyèna mbadyla to. Ncyèna muswè kucyenza to, mèmè pàanyi. Mpindyewu bàtu bàbàndisha bimanyishilu dìbà dyònsò ne: “Pèshaayi bânà aba nkolèshèlù wa mu cilongelu.” Bàdi bushùwà bàmukèngela, kàdi dyabùlù mmubàkwàte. Dyabùlù's mmubàkwàte. Kàdi kabyèna ànu byà pa ciibidilu bya bwena kupàtuka ne kwikala ne ciluuji cìbì ne—ne—ne kujoomona ciibi cyà ku lupangu ne kucilembeleja kuulu kwà mucì mu dilòlò dyà Halloween, anyi kwenza tuntu tukesè twà bucimbè mùvwà bânà bakesè ne ciibidilu cyà kwèna amu to, anyì kwangata ditempu dyà cidimè kuditèeka mu

220 Yèyè ne: “Kaa, Mwanèètù Branham, kacya ncitukù mwele meeji ku cyòci aci to.” Nwamònu’s, ki bwalu mbwòbù abu’s.

221 Nwamònu’s, tukàadi ku ndekeelu. Bantu bàà musunya, èkèleeziyà wa musunya wùdi kòkù aku, ku ndekeelu. Tàngilàayi mmuyaayàye shikùshikù too ne nsangilu wa maèkèleeziyà. Ba-Frères Unis mbakabwelèmu. Beena Mpenta bàdimù. Bakwàbò bònso mbadyenzè bulongolodi. Tàngilàayi mu cibandabanda mwàmwa, beena Kanààna abu, kubangila kwonsò eku too ne nyumà yà Esawù ayi, batèndeledi bàà wòd, ne kudisangabò ne bàà pa buloba; kabàyi cyumvwidi cyà nyumà to, kabàyi ne bukòlè bwà kucimuna nànsha, kabàyi basungula bàà Nzambi nànsha, bwà kubiikidiibwa bwà kupátuka ne kwikala batàpùlùke.

222 Kaa, bu mèmè mwà kucimanyisha, bu mèmè mwà kucipoopela mu mùshindù kampànda wà cìtùkina’s! Nyèwù kabàyi bàcimòna to. Bàdi ne mèsù kàdi kabàyi mwà kumòna to, ne maci kàdi kabàyi mwà kuumvwa to. Kaa, bwà cinyi tudi banèmè bujitu mu Nyumà mùshindù ewu? Mpindyewu, tèèlejàayi eci. Byònsò bìdi ku ndekeelu.

223 Ne Èkèleeziyà wa nyumà ùdi ku ndekeelu Wendè. Wàfiki ku ndekeelu. Èyi Nzambi! Tàngilàayi kale wàwa pàakatwàdijàYe ne Luther, kuupukayè, wa nyumà awu. Pashìishe ne Wesley, kulwa ku dijidiibwa. Pashìishe ne Mpenta, Nyumà Mwîmpè. Nènkù mpindyewu ku cikondo cyà nshìikidilu, Nyumà wa Kilistò pa nànkù mu Èkèleeziyà, Ùdi wènza byenzedi bîmwèbîmwè byàkenzàYe abi, kwalukila buludì ku Mutù Wèndè kàbìdi; mudilongòlòle bwà Èkèleeziyà ne Kilistò bwà kudisanga, ne Dilwa dyà Mukalenge Yesù, ne dibiikà dyà bafwè ku lufù. Tukàadi ku cikondo cyà nshìikidilu. Yesù wàkamba nànkù: “Ànu mwàkadibi mu matùkù à Sodomà, ki mwikalàbi kàbìdi ku dilwa dyà Mwànà wa muntu.” Nudi nucyùm vwa anyi?

224 Tàngilàayi èkèleeziyà wa musunya. Tàngilàayi kùdibo bàya, kule ne kule menemene.

225 Tàngilàayi Èkèleeziyà udi mùle tètè ne Nyumà, udi utàpuluka ne tuntu Twèndè twònsò tukesè twà macimbu atu, wènda ùbànda mu Nyumà, (mu banyaàbanyà, mu bushùwà bwà bwalu), ùlwa mu Nyumà, kàdi ùbànda mu mwaba wà mùshindù ewu too ne mùdìYe ùkafika mwaba ùdi Nyumà Mwîmpè ùkwàcilaMù mudimu, wènda ùDìpandila njila, mudyàkàje bwà kwakidila Mukalenge Wendè, mudyàkàje bwà kwakidila Mukalenge Wendè.

226 Kàdi yònsò wakùdiye wàkabwela mu bulongolodi, wàlukila mu maalu à pa buloba, mukòsòlòke, wàlukila mu nsangilu, ùkabwela mu nsangilu munène ku bulombodi bwà bwena Kàtòlikè. “Ne kùvwa cimfwànyì cyà nyama wa lwonji.” *Cimfwànyì*, “cintu bu nànkù.” Nsangilu wa èkèleeziyà mwenza kùdi bwena Kàtòlikè, bùbìdi bwàbò pàmwè, bàdi bàkwàta

mudimu pàmwè. “Nganyi udi ne bukolè bwà kwenza mvità ne nyama wa lwonji anyi cimfwanyi cyèndè?” Cyà bushùwà kakwèna muntu to. Mùshindù mwinè utùdiku bafwanyi ne kushàalapù munda mwà mèbà’s we!

227 Mpindyewu lekèlaayi nnwamvbile eci, pashiishe nekùlwe cikondo cyà kwimanyika. Mbwalu ndi ne . . . Mvwa munwambile ne nebiikalè bile. Ndi—ndi ànu ndyùmvwa mutàmbe kubinduluka. Pàvwà nànsha Nzambì mene mwambe bintu ebi, wàmba ne: “Baambilè. Cìjikùle. Kùshàadi mupùwe kàbìdì ntàntà mule nànsha. BáleejèCì. Bóbò kabàyi baCyakidile to, dìbà adi mashi kaèna pa byanza byèbè to.” Ki dìbà ndyòdi edi. Cikondo, byònsò byàtù ku cibungùbùngù.

228 Buloba bùdi ku ndekeelu wabù. Kabwèna kàbìdì mwà kwimwanyina kuulu to. Mvità yìdi ku ndekeelu wayi. Kanwèna mwà kupeta kàbìdì mvità nànsha. Nwènù biikalè ne mvità, kayàkunènga to; muntu wa kumpàla ùdi ùlenga ku ndèndè awu, kùdi kùmbà kùdikosa. Cìdiidi, ncibolè ne cyonèke.

229 Bukwa èkèleeziyà mba-Méthodiste, ba-Baptistes, ba-Presbytériens, beena Mpenta. “Nguluba mu bitoci byàyi, mbwa mu bilùshì byàyi.” Aci’s ncilelèlè, yònsò wa kùdibo! Nzambì ùdi ùbiikila Èkèleeziyà udi musungula awu, bwà kupàtuka mu dibola adi. Aci ncyà bushùwà menemene. Esawù, kwambabò ne: “Twètù ki èkèleeziyà!” Mémè ncyèna ngèla aci mpatà to. Yakòbò’s ùvwa taatù wa Esawù, yèyè pèndè, ncyà bushùwà, pa nànkù, kàdi—kàdi . . . Ndi njinga kwamba ne, Izàkà ùvwa tatwèndè wa Esawù, ne Yakòbò ùvwa mwanàabò, pèndè. Kàdi umwe ùvwa ne difutu dyà bukenji bwà bwanaabutè; mukwàbò ùvwa mudikine. Umwe wàkuumvwa, kujingulula, ne kwenza. Mukwàbò yèyè kwamba ne: “Kaa, bu mündi ànu nya mu èkèleeziyà ne ngèza cidi cyakàne, bìdi ne dishiilàngana kaayi?” Ki bwalu mbwòbù abu’s. Mpindyewu mu . . .

230 Nànkù ndi ngàmbe eci, bwà kwoya, kakwàbò kantu kàndi ndeeja aka. Èkèleeziya mulelèlè ùdi ne byàbùngì menemene byà kwikadila ne mwoyi bwà mpindyewu. Kaa, cìvwa ne cyà kwikala cikondo cyà cyanga menemene bwà Èkèleeziyà mulelèlè, bwà Èkèleeziyà wa bushùwà, bwà Èkèleeziyà musungula, paùdi umanya mu mwoyi wèbè ne udi muumùke ku lufù muyè ku Mwoyi; Paùdi ùditàngila wèwè mwinè ne umòna, utàngila nsòmbelu wèbè ne umòna ne bintu byònsò byà pa buloba bikaadi bimanè kupita, bwà ne udi mulwe cifúkìbwà cipyacipyà. Tèelejàayi mpindyewu, bwà kujikija, ne ntèmà yònsò. Udi mumanyè ne ukàadi muumùke, nsòmbelu webè ùdi ùcijaadika ne: “Ku mamuma àbò nkunwàbàmanyinà.” Kiipàcìlè kèèbè kònsò nkoòng n’Kilistò. Udi muMwindile bwà kulwaYè mu kasunsa kanà kònsò. Wèwè udi wenda mu Nyumà. Udi muMunangè. Udi uMumòna ùkwàcìla mudimu munda mwèbè. Kaciyi cintu nànsha cimwè cyùdi wèwè ujinga kwenza to, kàdi Yèyè ngùdi ucyènza, Yèyè mwinè. Kaa, cikondo kaayi’s wè!

231 Cidi cìmvùlwija muzòdi wàkaya ku Rome awu, bwà kulonga mwà kwikala muzòdi, nsongàlùmè wa citende. Bàakamumòna. Ùvwa mushiilàngàne bikolè ne bansongàlùmè bònsò bàà cyena Àmèrikè ne bansongààkàjì, ne bintu bìvwà biyè kuntwaku bwà kwikala bazòdi, ne bàà mu myaba mikwàbò yà pa buloba. Ewu nsongàalùmè yèyè ùvwa katàdi wa pabwèndè. Ùvwa muntu mwímpe, ne bôbò kudìmwèna. Bàvwa mwà kwenza mafetè manène, kàdi kupweka kuntwaku ne, mùshindù ùtùbò bènza mu Loomò awu's, bàkwàcika ne mwàbò mwònsò amu.

232 Mémè mwinè, mvwa kuntwaku, kàbìdi kubàmòna. Bàpàtuka mu mùsèèsù, balùme ne bakàjì, kàdi bènza maalu à lukutukutu. Too ne mu mpangu minène, bàngatangana bu balùme ne bakàjì mu lupangu lunène, patòoke too, kabàyì bàbùcyùka nànsha; Angleterre, pèndè, ne bakwàbò bònsò. Nwamònu anyì? Aku kí nkubi kupita munwemu to. Cidi ànu cintu cyà mwomùmwe ne munwemu, ànu byètu byà bibi ebi; cìkòlà, mbacìbwikilekù ànu kakesè ndambù munwemu, bwà bampùlushì ne bikwàbò. Mpindyewu, kàdi bìdi ànu bibyàbìbyàlà!

233 Èè, nsongàalùmè ewu, yèyè ùvwa mudilamè ku bintu byònsò ebi. Pàvwàbò bàya mu mafetè àbò awu, ùvwa ùbàlekela bàya, cìkòlà ùvwa munkacì mwà kulonga bwà kwikala muzòdi. Pa nànkù, dìngà ditùkù mulami wa lupangu wa kale uvwa mwena Kilistò ùvwa usanganyibwa pabwìpì ne—ne nzùbu wa dilamina mpìngù awu, ku màgàjiinyì à mpìngù, yèyè kwamba ne—yèyè kwamba ne: “Lwàkù tükendàkànèku, mwanàanyì wa balùme. Lwàkukù tükendàkànè, ndi muswè kuyiikilaku neebè kàtanci kakesè.”

Yèyè ne: “Èyo.”

234 Ki kuyabo, bènda bàbànda kakùnà, ne bònsò bwàbò ne byanza byela paanyimà, kubàndabo kakùnà. Dìbà òvwa dyènda dibwela. Ki muntu mununu ewu kwambila muzòdi wa citende ewu, wàmba ne: “Mwanàanyì, udi mwena Àmèrikè's.”

Yèyè ne: “Èyowà.”

235 Yèyè ne: “Udi mulwè kunweku bwà kulonga dizòla. Ndi ncinka ne udi wipacila bwà kwenza mudimu wà muzòdi mu nsòmbelu webè's.”

Yèyè ne: “Ndi ndilongolola bwà kwenza cyòcì aci, mukalenge.”

Yèyè ne: “Ndi njingulula ne wèwè udi mwena Kilistò.”

Yèyè ne: “Mémè ndi mwena Kilistò.”

236 Yèyè ne: “Èè, kùdi cintu cìmwèpelè cìndì muswè kukukonka. Ndi mukonke bakwàbò abu. Mbàmbe ne mbeena Kilistò, bôbò pààbò.” Yèyè ne: “Ncinyì cìdi cìkwenza mushiilàngàne nùnkù? Ncinyì cìdi cìkwenza mushiilàngàne ne bakwàbò bansongàalùmè bàà ku Àmèrikè aba, ne bansongààkàjì bàdi bafùme ku Àmèrikè aba? Ncinyì cìdi citàmba kukwenza

mushiilàngàne bikolè nàнку, pèènù nwamba bônso ne nudi 'beena Kilistò'?"

Yèyè ne: "Mukalenge, udi umòna mùdì dībà dībwela emu anyì?"

Yèyè ne: "Ndi mumòne."

²³⁷ Yèyè ne: "Dyàmwàmwà dyà mbù dyàdya, mu ditùnga kampànda mu Nouvelle Angleterre, mu cimenga kampànda mu ditùnga amu, ne mu nzùbu kampànda mwine mu cimenga amu, mùdì nsongàakàjì kampànda ùndì mulayè ne nènshaalè ne lulamatu kùdiye." Yèyè ne: "Ki cyònsò cìdì mu meeji ànyì, bwà kulonga kuzòla ne kwalukila kùdì nsongàakàjì awu udi ne lulamatu kùndì." Yèyè ne: "Ke bwà cinyi ndi ngènda bu mùndì ngènda emu."

²³⁸ Kaa, mwanèètù wa balùme, mwanèètù wa bakàjì, udi mufwànyine kudikonka bwà cinyi katwèna tucyùka mènà àdìbo bàtwinyika. Mèmè ncyèna ncyùka bìdìbo bàmba to.

²³⁹ Mwua mwimàne ne Fred dīngà ditùkù, kwīnshì mu San Juan, mu Puerto Rico, mwua mutàngile dyàmwàmwa dyà mbu, ke mèmè kumòna ne, mabwe à kumpenga kwà màyì awu, ntàntà wa mètres nkàmà mwandamukùlù, mavwala manène àbànda. Ki kwambayè . . . Ntuubà yènda yèndakana mu budimi, ne bikwàbò. Mèmè kwamba . . . Yèyè kwamba ne: "Mwanèètù Branham, eci ncyènze ànu bu Dyulu."

²⁴⁰ Mèmè kwamba ne: "Kàdi's mbù neyikale mubàtamè kwàka, mwanèètù." Mèmè kwamba ne: "Ànu dyàmwàmwà dyà mbù dyàdya, kùdì mwaba kampànda ùbìikidiibwa ne Dyulu, kùdì Muntu kampànda ùbìikidiibwa ne Yesù, mu Dyulu emu, ne ditùkù kampànda Wàkuumusha mpèkaatù yànyì yònsò. Nènku ngaakaMulaya ne nèngendè ne lulamatu kùdiYe, nèngenzè bintu bìdìYe muswè bwà mèmè kwenza. Ki bwà cinyi mèmè ncìtu ngùmwa bundù bwà Èvànjeeliyò Wendè to, Ùdi Bukolè bwà Nzambi bwà lupàndu." Ki cìdì cyènze ne mwena Kilistò ikalè ne nsòmbelu mushiilàngàne. Yèyè mmushiilàngàne bwalu ùdi ne Cintu kampànda bwà kwikala ne nsòmbelu mushiilàngàne.

Twīnyikàayi mitù yètù katanci kakesè cyanààna.

²⁴¹ Mulunda wànyì mucibùlùke, mu dindà emu, udikù ne cintu kampànda cishiilàngàne cyà kwikadila ne mwoyi, cintu kampànda cyà kukupàtula naaci mu byà pa buloba, cintu kampànda cìdì ne musinga wàbùngì nememene kùdì kutàmba byà pa buloba byònsò, nkwikala ne mwoyi bwà Kilistò anyì? Wèwè kùyì ne aci to, bwà cinyi kwèna mwà kuCyàkidila mpindyewu ewu. Kùyì mu èkèleeziyà ànu bwà kwamba ne: "Ndi muswè kwikala muntu mwimpè to." Kwènji nàнку to. Udi muswe kwikala mwena Kilistò. Wèwè, pìikalàku misangu yònsò cintu kampànda mu mwoyi wèbè, cìkwàmbila ne: "Kwena mujaalàme to, kàdi ndi muswè kwikala mujaalàme." Wèwè utu misangu yònsò ànu mujinge kwikala cintu kampànda cyùdi

kùyì mpindyewu to, kwèna mumanyè ne n'Nzambì udi munkaci mwà kukubiikila anyi? Kùcyedi nyimà to. “Bwalu pawikala wakakenkeshiibwa musangu kampànda ne mupetè mpùngà, kàdi mucidyombole musangu wèbè wà ndekeelu, ki nkushààle kàbidì mulàmbù wà mpèkaatù to.” Kùkabwelakànyì ne Esawù to.

²⁴² Lwàku kùdì Yakòbò, kùyì ucyùka ní...kùyì ucyùka cyàkwenzekela nànsha. Byòbi bikwangàte nzùbu webè, byòbi bikwangàte mudimu wèbè, byòbi bikwangàte bàyeebè, byòbi bikwangàte mukàjèèbè, byòbi bikwangàte bânà bèèbè, byòbi bikwangàte ní cinyì cyònsò, petà wèwè bukenji bwà bwànàbutè! Ki bùdì ne mushinga. Nènku wèwè múmvwe mùshindù awu, mu dindà emu, ne mufwànyine kujinga bwà kupeta bukenji bwà bwanàbutè ebu! Mèmè ncyèna mwà kukupèeshaci to. Nzambì ùdì mwà kukupèeshaci, ne Yèyè Ngudi wakula neebè ewu. Udikù mwà kwela ànu cianza cyèbè muulu cianaàna, kwamba ne: “Nsambìdilèku, Mwanètù Branham. Bukenji bwà bwanàbutè abu, mbùndì muswè.” Nzambì ànubènshè, myaba yònsò. “Bukenji bwà bwanàbutè, mbùndì muswè.”

²⁴³ Taatù wetù wa mu Dyulu, ndi nKusàkidila, Nzambì Mutàmbe Bunèmè ne wa Cijila, bwà bwimpè Bwèbè bwònsò ne luse kùdì bânà bàà balùme ne bàà bakàjì bàà bantu. Ne tudi tujungulula ne tudi ku cikondo cyà nshìkidilu, kakwèna cintu cidì mwà kutamba kunenga bikolè to. Tudi ànu bindile mu cikondo citùsombesha; ànu mwàkadìbi mu matùkù à Noà, mwoyi mule wà Nzambì, pàvwà bwàtù munkaci mwà kulongolodiibwa, pàakasùngidiibwà misùkà ànu mwandamukùlù cianaàna. Wèwè wàkamba ne: “Ke mwikalàbi nànkù ku dilwa dyà Mwànà wa muntu. Mwoyi mule wà Nzambì, kàyì muswè bwà muntu nànsha umwe àbùtukè to, kàdi bwà bònsò bààmòna mwà kulwa ku kanyinganyinga.”

²⁴⁴ Nènku leelù ewu mu nzùbu emu, kùdì balùme ne bakàjì belè byanza byàbò muulu, bânà bàà balùme ne bàà bakàjì, bansonga ne banunu, mbèlè byanza byàbò muulu, kàbidì bàmba ne: “Kùdì Cintu kampànda cinkòka.” Èyì Nzambì, swàkù bwà kabàCidyombòdiku nànsha. Swàkù bàsùmbishe malonga àbò, swàkù bàsùmbishe bintu byònsò bidìbo naabì. Bu muntu wakasangana dibwe dinène adi; òvwà dyà mushinga, dibwe dinène, òvwà dibwe ditàmba bunène, nènku wàkasùmbisha twèndè twà takesè twònsò, bwà wàmòna mwà kusùmba dibwe dyà pabwàdì adi, dyà dinène. Swàkù bwà bàsùmbishe cintu cyònsò cyà pa buloba cidìbo naaci, mu dindà emu, dimanyika dyàbò dyònsò dyà pa buloba.

²⁴⁵ Bakàjì bàdì basòmbe apa aba, Mukalenge, bàabùngì bàà kùdìbo bàkaadi bumvùmvwe Èvànjeelìyò muyiishìbwe misangu yàbùngì be, cikòlà bènda ànu bàlálakana mu maalu à pa buloba, ne bàdìtwàla bu bàà pa buloba ne bàvwàla bu bàà pa buloba, ne bàya mu mafetè ne mu bintu bidì bàà pa buloba,

bààbanyangana bintu byà pa buloba ne bènza maalu bu bàà pa buloba, ne biikàle bàkwàta mudimu ne bintu byà pa buloba. Éyi Nzambì, swákù bwà bàdyūmvwè bundu, mu dindà emu. Kwòkò kwikàleku ditèkemena kampànda munda mwàbò emu, Mukalenge, dikàngulaaku leelù ewu. Swákù bwà edi diikale dibà.

²⁴⁶ Ne balùme bàdi mwab'ewu aba, Mukalenge, Éyi Nzambì, bàfwilèku luse. Bààbūngi bàà kùdìbo bàcidi bàpatuka bèndela mu bintu byà pa buloba baciikàle ànu bàjinga ne bàsànkila mu bintu byà pa buloba, mpèkaatù, dinwà dyà mfwankà, dinwà dyà maalà, maalà à mu nsòmbelu, ndambù wa byèrè ku luseke, anyi—anyi cintu kampànda cyà mùshindù awu, anyi bafwànyine kwalakana, ne bàlamika bibèjibeji byà bakàji batekète, balwàte bilàmbà byà manyaanù. Ne mibidi ayi yidìbo bàbandila mu mùsèèsù, ne bafwànyine kutuuta too ne bantu ku màshinyi bwà dibàtàngila, bàdibìikila mùdìbo beena Kilistò.

Kàdi pààbò mbamanyè ne mbungakenu wa mubidi wà mukàji awu, pàmwápa mu mèbà makumi àbìdì ne ànaayi àdì àlonda, newikalè wènda ùbola mu lukita mwàmwa, biinya ne misàndà byènda bilandala mu mijilu mifwimba ne milongolola yà mubidi wèndè ayi; kàdi musùukà wèndè mwàmwa mu ifernò wa dyabùlù, bwà mùshindù ùvwàye mwènde. Kàdi, nànsha nàнку, neàtadikè tushikù twèndè tukesè, tupenta atu muulu, kàdi kukenya ku mènù ùkuseka.

²⁴⁷ Nzambì, ikàlàku ne luse bwà bantu abu. Éyi Mukalenge, kùbàlekèdì bàjìmina to. Bwà luse ikàlàku ne luse kàbìdì ne tumàku luse. Pèèshaku yònsò wa kùdìbo, Mukalenge. Wèwè ki Umwèpelè udi mwà kufila dibènesha edi. Nènku pawikalè Wèwè mubàbìikile ku Mwoyi wà Cyendèlèlèlè, swákù bwà myoyi yàbò yikangukè; ne bàteekà bintu byònsò ku luseke mu dindà emu, ne pashìishe nebàcyàngatè. Enzàku nàнку, Taatù.

²⁴⁸ Nènku mpindyewu swákù bwà Nyumà Mwímpè àbwelèku mu disangisha edi, bwà babèèdì ne beena ntàtu, ne bantu bàmonèku ne Mukenji ewu ùdì muyishìibwe mu dindà emu, ne Dilwa ne byònsò bìdì ku ndekeelu, ne nànsha mene Yesù munkaci mwà kukwàta mudimu mu Èkèleeziyà Wèndè. Byenzekèku mpindyewu mene, Mukalenge, bwà Wèwè kumòna mwà kwangata bantu aba mu byanza Byèbè. Nènku pàdìbo bàmonà Nyumà Mwímpè ùkwàta mudimu, wèndakana munkaci mwà bantu, swákù bìshìndikiibwè, Mukenji ùndì muyiishe, bwà ne tudi ku ndekeelu kwà cikondo. Nènku swákù búmvwèku. Búmvù, kàdi swákù bwà bàjingulule ne Yesù umweumwe awu, mùshindù wàkenzàYe mu ditùkù Dyèndè awu, Udi mwab'ewu ùcyènzela mu Èkèleeziyà Wèndè mu ditùkù dyà ndekeelu emu. Nènku dibà adi swákù bènzeku, mu kufilà kwà myoyi ne mibidi yàbò, ne misùukà ne nyumà, kùdìYe. Ndi nKupèeshabò, Mukalenge, mu Dìna dyà Yesù.

249 Mpindyewu, mu nzùbu mùdi bantu emu, mvwa mutùme Billy mu dindà emu bwà kwabanya twartà twà disambila. Yèyè... [Katùpà kàà mukàbà wà mèyì munda mutupu—Muf.]

250 Udi usaama, mu lukèngelu anyi? Bu Nzambi mwà kumbuulwila, bu mwàkenzelàYe mukàji ku ciinà cyà màyi, ne kungambila lutàtu lùdi naalù, anyi cintu kampànda cidì cikutàngila, cyùdi wèwè mumanyè ne mémè ncyèna mucimanyè aci, ncifwànyìnekù kukupèsha diitabuuja bwà kwitabuuja Nzambi anyi? Ncifwànyìnekù kwenza ne nwnènù bakwàbò nùpetè diitabuuja anyi? Eci ncikondo cyètù cyà kumpàla cyà twètù kutwilangana anyi? [Mwanèètù wa bakàji awu ùdi wàmba ne: “To.”—Muf.] Kaa, ukàtu mummòne kumpàla, kàdi pàànyì mwikàle mwenyi kùdi. Ncyà bushùwà anyi? Bìmpe, Mukalenge Nzambi ànyishèku àkupèèshè mulòmbò wèbè.

251 Mpindyewu, mbulelèlè, anyi to? Kaa, ekèlekèlè! Sòkaayi ntèndeleelelu wenù wa mamanya à mu mutù awu. “Baalà,” nwamba ne: “ùdi penyi?” Eliyà ku mukùnà wà Kaamèlà, wàkamba ne: “Baalà ùdi penyi? Penyi? Mubìshaayi.” Kabyèna bikèngela bwà wèwè kubìsha Yesù to. Yèyè ùtu dìbà dyònsò ànu mutàbàle. Yèyè ùdikù dìbà dyònsò, ne mwoyi kashidi, ne bukolè kashidi; umweumwe awu makèèlèlè, leelù, too ne kashidi. Amen. Nzambi ùdi ùshààla Nzambi.

252 Udi witabuuja ne disaamà dyèbè dyà mwoyi nedìkushiye ne neùmvwè bìmpè anyi? Kwèna wa munwemu to. Wèwè udi walùkila ku Lexington ne ùkalondèlè bantu bintu binène bidì Mukalenge mukwenzèle. Wamònu anyi?

253 Bidi bìpicila bantu pa mitù, bàdi kacya kabàyi babyùmvwà nànsha. Èkèleeziyà wa mwoyi ùvwa mwà kukwàta cyòci aci, lùkàsàlùkàsà, ne kumanya ne Bwikadi bwà Nyumà Mwìmpè bùdi mwaba ewu.

254 Muntu kampànda lwà mu ndekeelu emu mmwelè cianza cyèndè muulu. Ùvwa ngwèwè anyi, inàbànzà? Udi witabuuja ne Nzambi ùdi mwà kungambila lutàtu lwèbè anyi? Mukulumpe... .

255 Mwanèètù udi lwà ku ndekeelu wàwa, ndi ngèela meeji ne wàmbi, kùkaadi katanci, ne... . Udi witabuuja anyi, mwanèètù? [Mwanèètù wa balùme awu ùdi wàmba ne: “Èyowà.”—Muf.] Udi witabuuja menemene anyi? Dìbà adi disaama dyà pa dikòbà adi nedìkushiile kaaba, neùsangalè. Udi witabuuja nàнку anyi? Udi ucitaba bu mwondòpiibwe anyi? Elà cianza muulu, udi witabuuja menemene. Nwamònu anyi? Uh-huh. Èyo. Yèyè mmwenyi kùndi. Udi mumanyè aci’s, Pat.

256 Mukàji udi mutàngile kwaka ewu, munkacì mwà kusambila, ùvwa muntàngile, wàmba ne ùvwa mwenyi. Udi witabuuja ne disaamà dyà mashi ènda lùbilu adi nedìkushilè kaaba anyi? Ncyà bushùwà, kí mmwòmò anyi? Elà cianza cyèbè muulu piikalàbi ne ncyà bushùwà. Èyo, ikàlà ne diitabuuja mu Nzambi.

Nudi numòna cìndi njinga kwamba aci anyi?

257 Kadi bishi bwà bàmwè bàà kunùdi bàdi bammanyè? Udi ne cintu kampànda pa mwoyi wèbè. Elà cianza cyèbè muulu. Nudi bààbùngì be! Ncyèna mwà kucyènza to; Cìdi ànu ne cyà kulwa. Nudi bamanyè's, ndiitabuuja dyènù.

258 Georgie Bruce, ndi mumumòne musòmbe mwaba awu. Wèwè utu misangu yònsò ànu uteeta bwà kupeta cintu bwà muntu mukwàbò, Georgie. Uvwa mwondòpiibwe, ku kànsèrè. Kakwèna mpatà mu meeji èbè to. Ditùkù diwàkalwà mu tabernacle emu ne kupàtuka ku ciibi cìdi pambèlù pàpa, Nyumà Mwímpè wàkampwekela, ne kukwambila ànu mwaba awu cyenzenedi kampànda cívwa muntu kampànda wa pa buloba kàyì mumanyè to pa kuumusha wèwè ne Nzambì ne muntu mukwàbò. Ncyà bushùwà anyi? Ncyà bushùwà. Udi ungiitabuuja mèmè, kì mmwòmò anyi, Georgie? Udi ne cintu kampànda pa mwoyi wèbè, Georgie. Udi witabuuja ne Nzambì ùdi mwà kungambila cìdi pa mwoyi wèbè anyi?

Aci ncifwànyine kwenza ne bwònsò bwènù, bantu bàdi bammanyè mèmè, nwitabuuje anyi?

259 Ndi mumanyè Georgie, kàdi ùdi wèla meeji à cintu kampànda. Ùdi ne bantu bàbìdi, bàdi ntántà mule ne apa, bàdiye ùsambidila. Bònsò bwàbò mbasòmbèle mu Corydon. Ncyà bushùwà. Kàdi ùdi ne muntu mùnwemu, muntu mulùme udiyè ùsambidila, udi pambèlù apa mu lùpitaadi. Ne wèwè udi munkaci mwà kusambila, kabiyi nangànangà bwà dyondopiibwa dyèndè to, kàdi bwà lupàndu lwà musùukà wèndè. Aci's ng'EMU MUDI MUKALENGE WÀMBA. Ncyà bushùwà. Ncyà bushùwà anyi, Georgie? Ncyà bushùwà menemene.

260 Muntu kampànda lwà paanyimà pààpa mmwelè cianza cyèndè muulu, lwà mu ndekeelu menemene, mu ndekeelu emu. Wèwè, bwalu bwèbè bùdi bishi? Udikù mwà kwela cianza muulu anyi, udi mwenyi kùndi anyi? Muntu mulùme udi musòmbe kaaba aka muntàngile ewu, ncyèna mukumanyè to. Udi witabuuja ne mèmè ndi mupròfetà wa Nzambì, musadidi wa Nzambì anyi? Udi witabuuja Nyumà Mwímpè, cìndi mwambè aci ne m'Bulelèlà anyi? Udi witabuuja Aci anyi? [Mwanèètù awu ùdi wàmba ne: "Èyowà."—Muf.] Bu wèwè mwà kwitabuuja, udi ne . . . ki cintu cimwèpelè cyùdi naaci, bwalu udi usaama kànsèrè. Ncyà bushùwà. Kwèna wa mu cimenga eci to. Udi wa mu New Albany. Aci ncyà bushùwà. Ne udi ne kànsèrè. Bu wèwè mwà kwitabuuja ne mwoyi wèbè wònsò, neùmvwè bìmpè. Neucitabè anyi? Elà cianza muulu. Mukalenge àbèneshiibwè.

261 Ndi ngiitabuuja, mukàji wàwa udi ne cifulu cimwèka citòoke ku mutù kwèndè, inàbànzà wa bafikè, mmwèle cianza cyèndè muulu. Neivwa mwànji kupeta muntu mufikè to. Udi witabuuja anyi, inàbànzà? Èyo, mukalenge, itàbùùjà ne mwoyi wèbè wònsò. Udi ne disaamà dyà mwoyi, disaamà dyà cifu, ntàtu

mikòdyàkànàngàne. Muntu kampànda mmukufikishe kaaba aka mu dindà emu. EMU MMÙDÌ MUKALENGE WÀMBA. Ncyà bushùwà, kí mmwòmò anyì, inàbànzà? Pìikalàbi ne ncyà bushùwà, nyungisha mùshwàlà ùdì naawù mu cyanza awu, bwa bantu kumònabu. Kacya ncitukù mwanji kumòna mukàji awu to kacya bàndela.

²⁶² Uvwa mwelè cyanza muulu anyì? Mèmè ndi mwenyi kùdì anyì? Ne wèwè mwenyi kùndì. Udi witabuuja ne Nzambì mmummanyè, anyì Nzambì mmukumanyè anyì? Udi witabuuja ne Yèyè ùdì mwà kungambila cìdì pa mwoyi wèbè anyì? Udi munkaci mwà kusambidila muntu kampànda. N'tatwèbè, udi ne dĩaamà dyà mwoyi. Ncyà bushùwà. Ne wèwè udi munkaci mwà kukeba dibàtiiza dyà Nyumà Mwímpè. EMU MMÙDÌ MUKALENGE WÀMBA.

Bu wèwè mwà kwitabuuja!

²⁶³ Bwalu bùdì bishi bwà inàbànzà wàwa ne cyanza cyela muulu mùshindù ewu, udi witabuuja anyì? Lutàtù lwèbè mmubòzù ùdì ku cyanza cyèbè awu. Kàdì udi munkaci mwà kusambidila mwikùlwèbè. Ncyà bushùwà. Mwànà awu kènà bímpè to. Aci's ncilelèlè. Ki mmwòmò anyì, inàbànzà? Udi witabuuja ne mwoyi wèbè wònsò, bwà bwalu abu.

Pàngàakambà ne: “mwànà.” Anji indilà kakesè. Kaa, s'ki bwalu mbwòbù abu's. Mwanèèbè wa balùme ùvwa mupele njiwù yà mashingini; mucibùkile panshi. Ncyèna mukumanyè to, inàbànzà, kàdì aci ncilelèlè. Pìikalàbi ne ncyà bushùwà, ela cyanza muulu.

²⁶⁴ Mpindyewu, Nganyì udi kaaba aka ewu? Nganyì Mwinè awu? Ki mmèmè to. Mmunyi mündiku mwà kwenza nànkù? Kanukwàciki tukùlākàjì twà Nyumà to, bintu byà Nyumà. N'Nzambì kaaba aka! Nyumà Mwímpè ùdì ujinga awu, udi uMwitabuuja mpindyewu anyì? Udi uMwitabuuja mpindyewu anyì? Èyo, nànkù Mwakidilaaku mpindyewu. Mpindyewu ki dībà dyà kuMwakidila. Itàbùùjà ne mwoyi wèbè wònsò.

²⁶⁵ Wèwè udi usaama anyì mu lukèngelu awu. Ncyèna mwà kwondopa to. Muntu nànsha umwe kèna mwà kwondopa to. Ncyèna mwà kufila Nyumà Mwímpè to. Kàdì Ewu udi mwà kwondopa ne kufila Nyumà Mwímpè, Ùdì kaaba aka. Yèyè Ngudi Ucyènza.

²⁶⁶ Mpindyewu inyikaayi mitù yènù panshi. Itàbuujaayi ànu mpindyewu, pàndì nnusambidila ne mìshwàlà eyi kàbìdì apa.

²⁶⁷ Taatù wetù wa mu Dyulu, ne mwònsò mùndì pàányì mumanyè, ndi mupicile kùdì bwònsò bàvwà beenyi, múmvwà ngùmvwa ngènda nteketa ne ncyòka; mèmè kudyùmvwa mulombòdìibwe ne eci ke cikondo pàmwàpa cìdì Basungula bamòne. Swàkù bwà yònsò wa kùdìbo, Mukalenge, uvwa mubiikidìibwe ne mwanishiibwe bwà kwikala mubiikidìibwe kùdì Nyumà Wendè; cintu kampànda, diitabuuja dyàbò, bàvwà

ne diitabuuja dyàbùngi (bàmwè bàà ku bôbò) kutàmba mùvwàbo bèèla meeji ne bàvwa naadi. Mbabangile ànu mu myoyi yàbò.

268 Ki mukàji awu kulengayè civwàlù Cyèndè musangu kampànda pàvwàYe ùpita, ke kukùdimukaYè ne kwamba ne: “WàNdengi awu nganyi?”

Ki bôbò ne: “Èè, bantu bônso mbaKulengè.”

269 Yèyè ne: “Kàdi Ndi ngùmva ne Ndi ne butekètè.” Ki kusanganaYè mukàji mutekète awu ne kumwambila ne ùvwa ne disaamà dyà mashi àlwa munda, ne diitabuuja dyèndè dyàkamwondopa.

270 Ne Bible mmwambè, ne: “Yèyè ùcidi ànu Mwakwidi Munène, leelù ewu, udi mwà kulengiibwa kùdi dyumvwa dyà mateketa ètù.” Mufùndù mmwambè ne: “Yèyè ùdi umweumwe awu makèèlèlè, leelù, too ne kashidi.” Nènku piikalabi ne Yèyè udi umweumwe awu, ne Mwakwidi Munène umweumwe awu, Yèyè neènzè cintu cimwècimwè aci ne kwenza cintu cimwècimwè aci.

271 Ne swàkù bwà bantu bàmonè ne Èkèleeziyà mùle tètè ne Nyumà ùdi wènda ùlwa mutàngile ku mutù. Kilstò ùdi pabwipi ne kulwa kwangata Èkèleeziyà Wendè. Bimanyinu Byèndè binène byà ndekeelu abi, ànu mwàkadibi mu matùkù à Sodomà; Wàkakula, kumanya Sarah, ne kumanya ne ùvwa ne mukàji dyèndè Sarah, kumanya mùvwaye mu ntentà ùseka; Wàkamba ne: “Aci neciikalè cimanyinu. Panwàcimòna, nwavùlukaayi, ne lukòngo alu kalwàkupita byònsò kabiyi byùlè to.” S’ki cyòci eci. Tukàadi ku ndekeelu.

272 Enzàku, Mukalenge, bwà muntu yònsò udi usaama mwaba ewu amanyè ne Yesù Kilstò udi ne mwoyi awu ùdipù. Swàkù bwà mishwàla eyi yibèneshiibwè bwà mubidi wònsò ùdi ùsaama kwàyayi aku. Ndi mpiisha dyabùlù, bwà bantu. Ndi mmwipata, ku Nyumà wa Nzambì, mu diitabuuja, ndi ngiipata mundidimbì wònsò wà mpatà. Swàkù bwà muntu yònsò kaaba aka, udi mulongolwela Mwoyi wa Cyèndèlèlè awu, àWùpetè pa dībà edi. Diitabuuja dyònsò dyà màjĩmbu, dyeyemena dikesè dyònsò, tuntu tukesè twònsò twà pa buloba, bujitu bukesè bwònsò, bu mùdi Bible mwàmbè ne: “Tùteekàayi ku luseke bujitu bwònsò, ne mpèkaatù udi utùjĩngila bipeepèle; bwà twamòna mwà kunyeema, ne lutùùlù, lùbilu lùdi lutèèkiibwe kumpàla kwètù elu; batàngile” (ku cinyi? ku èkèleeziyà anyi? ku bulongolodi anyi?) “kùdi Mubangi ne Mujikiji wa diitabuuja dyètù,” udi kaaba aka mpindiyewu ewu, “Yesù Kilstò, Mwànà wa Nzambì.” Batàngile kùdi Ewu Udi. . .Katwèna ne cyà kwangata myàkù yitùdi bamanyè yidi milelèlè, kàdi nànsha nànkù Mèyi awu mmavwijìbwe malelèlè kutùdi mu dindà emu. Yesù umweumwe wakafwà awu, kì mmufwè to, Yèyè mmubiike kàbidì ku lufù, ne bidimu binunu bibidì pashiishe Yèyè ùdi ùtwàla Èkèleeziya Wendè ku mutù. Nyumà wa Yudaàsà ùdi ùkwàta mudimu

munkaci mwàbò. Kàdi swákù bàteekè ku luseke dibwè dyònsò dyà cilèndwishi ne byònsò, pa dibà edi, ne bàMwakidilè.


²⁷³ Swákù bàtèèlejeku, cìdibo naaci, mu diyisha emu. Swákù bàjingululèku mpindyewu ne Méyi mene àdìbo búmvwe mmamwènèshùbwe patòòke, ne mbajingulule Cyôci aci, ne Cidi n’Kilistò. Nènku swákù mpindyewu bwà bènzèku, baDitèèke mu cyenzedi: bàDyakidilè, ne biimanyine kuulu, bàfilè bujaadiki; ne kubwela mu Bukalenge bwà Nzambi, mu kwikala bulè tèntè ne Nyumà Mwîmpè.

²⁷⁴ Swákù bwà babèèdi bwòndopiibwè. Swákù bwà beena ntàtu bwòndopiibwè. Swákù bwà dijinga ne dijinga dyònsò dyà mu mwoyi edi diikalè dilelèlè. Enzàku nànkù, Nzambi wa Bukolè bwònsò.

²⁷⁵ Mpindyewu ne mitù yènu miinyika, myoyi yènu myunzulula, ànu bwà kunùpèèsha cipòlù cyà disambila; ànu kumpàla menemene, ngèèla meeji ne, mudimu wa dibàtiiza wùlwalwà, pabwìpì menemene ne cyôci eci. Nekwikalè disangisha dikwàbò dilòòlò edi.

²⁷⁶ Mpindyewu, vùlukàayi ne, kùlekedikù mpùngà ewu wùpita to. Ndi mwab’ewu kùkaadi mèbà matwè ku àbìdi ne citùpà, anyi mapite, nteeta ànu bwà kwangata dîbà dyànyì, ne kutwàla Èvànjeeliyò, ne kuMubweja ànu bìmpè menemene. Dîbà adi tudì tupweka too ne ku ndekeelu; Kàdi cyena-bwalu mene cidi ne: kutèèleja, kujingulula, kwenza. Kanùlekedì eci cinùpicila pa mutù to. Nudi baCyúmve. Nudi nwitaba ne Bwikadi Bwèndè bùdi apa anyi? Udi mumanyè ne n’Yèyè udi ukubiikila anyi? Dîbà adi enzèlaPù cyenzedi. Nzambi ikalè neenù. Ìkàlaayi ne cikondo cyà disambila.

²⁷⁷ Mwanèètù Neville, lwàku, katancì kakesè, mu disambila, bu wèwè mwà kubànda kùneeku.

Shààla ànu mumwimànyike. 

60-0221 Kutèèleja, Kujingulula,
Kwenza Cidi Dìyi Dyà Nzambi Dyàmba
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org